

### *ASO TOFI, 09 MATI 2023*

*Na nofoia e le Fofoga Fetalai le Nofoa i le itula e 9:30 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoao Faitulafono.

E faafeiloai atu i le paia o le tatou Palemene i lenei taeao i le toe faaauau ai o le tatou galuega e pei ona tolopo mai ai le aso ananafi. O paia e le avea a o mamalu foi e taolua i le tuga, ia ma sa matou gagana i le afio o lau Afioga i le Tamaitai Palemia o le Taitai o le tatou Malo, afio foi lau Afioga i le Sui Palemia, afifio le Aiga Kapeneta i a outou Afioga i Minisita. E faapea foi le afifio o Afioga i Minisita Lagolago.

E faafeiloai atu foi i lau Afioga i le Taitai o le Itu Agai ma le saofaiga mamalu i Afioga i sui usufono uma o le tatou Palemene. Faamalo le soifua manuia ma le lagi e mama.

E tatou te faafetaia pea le Atua i Lana tausiga alofa ua mafai ai ona tatou toe fesilafai i le manuia ma le filemu i lenei aso fou.

E faatalofa atu foi i le paia o lo o sasao nei i le tatou Maota, i Afioga i Ofisa Sili o Pulega o Matagaluega ma Faalapotopotoga Tumaoti a le tatou Malo, tainane foi nisi o le atunuu ua auai mai mo le molimauina o a tatou taulumaga. E ofo alofa ma faatalofa atu.

E faatulima ma faatalofa atu foi i le faafofoga tapuai mai a le atunuu i ona tafa e fia i ona tulaga faalupelupeina, taeao manuia i lo outou lagi e mama. Faafetai atu i a outou Afioga mo le tali faaaloalo foi i se taumafai atu a le Fofoga Fetalai i le aso ananafi e tusa ai ma le tatou laei uliuli mo le aso Fono lenei. E le fesiligia le silasila maimoa mai o le tatou atunuu i lenei taeao, o lea ua tausolomua lava le Palemene, tulou, i lenei faamoemoe, ona o le pelega mo tina ma tamaitai ma alo ma fanau, ina ia alofia le aiaina o a latou aiatatau ona o sauaga e faasaga ia i latou, faamalo faafetai.

Le tatou galuega i lenei aso, e maualuga le taofi, o lea ua maea ona utu matagi i le liu o le aitu na leiloa ma le faatalatala o se mata e emo. Ia manuia tele le usugafono a le paia o le Palemene, manuia foi le tapuai mai a si o tatou atunuu.

**ILOILOGA O LIPOTI A KOMITI FAA-PALEMENE MA TALIA  
LE MALO**

**P.P.2022/2023 NU.14, LIPOTI A LE KOMITI O TUPE MAUA MA  
TUPE TOTOGI I LE P.P.2020/2021 NU.78 MA LE P.P.2021/2022  
NU.33, LIPOTI O FAAMATALAGA MA TALA O TUPE A LE  
FAAPUTUGATUPE O FAAMANUIAGA O TAGATANUU  
MATUTUA O SAMOA MO TAUSAGA FAALETUPE 2019/2020 &  
2020/2021**

**P.P.2022/2023 NU.77, TALIA LE MALO I LE P.P.2022/2023 NU.14, LIPOTI  
A LE KOMITI O TUPE MAUA MA TUPE TOTOGI I LE P.P.2020/2021  
NU.78 MA LE P.P.2021/2022 NU.33, LIPOTI O FAAMATALAGA MA  
TALA O TUPE A LE FAAPUTUGATUPE O FAAMANUIAGA O  
TAGATANUU MATUTUA O SAMOA MO TAUSAGA FAALETUPE  
2019/2020 & 2020/2021 – ILOILOGA**

**FOFOGA FETALAI:** E tolopo taualumaga a le Fono Aoaofaitulafono i le aso ananafi ua maea felafolafoaiga a le Maota i le Lipoti a le Komiti ma Tali a le Malo.

O le mea lea ou te tapa lau Afioga i le Taitaifono mo lau Saunoaga e talifuaitau i nisi o mataupu sa laga e sui usufono mamalu. Lau Afioga i le Taitaifono.

**Afioga FALEOMAVAEGA TITIMAEA TAFUA (Taitaifono Komiti o Tupe Maua ma Tupe Totogi):** Faafetai mo lou avanoa lau Afioga i le Fofoga Fetalai ua tatou o ai i le taulaga na e siitia ma momoli aua le tatou vatapuia ma le Atua. Ua maea foi ona e oo i paia ma mamalu o sa ma faiga o lo o afifio ma ee papaaao i totonu o lenei Maota. Ou te iloa o le a le toe oo i ai se faamatalaga. Ae lau Afioga, a o le i oo atu i tiute ma faiva e pei ona e taua, se i oo ifo lava sau faamatalaga i lou itumalo o lo o tapuai, lou itumalo o Aleipata fale i lalo i le afio o le Afioga i le Tuiatua na Faanofonofo, afifio Alaalaimalae, afio le Tane o le Itu ma le Alii o le Itu, Pule na Tatai, Lalovi ma Malaefono ma upu ia te oe Saleaamua.

Ae ao foi ona o oi le afaigaluega tofofi a le Atua i le afio o lau Afioga i le Toeaina Faatonu, afio le Afioga i le Alii Sea ma le Au Tausi Matagaluega, faapea foi Susuga i Toeaiina o so o se fatafaitaulaga, afio lau Afioga i le Epikopo, Tiakono ma Fesoasoani, nofo a faafeagaiga o le Ekalesia o le Faapotopotoga a le Atua po o le Assembly of God. Ia, ae a le susuga i le faafeagaiga o le Toe Afio Mai, le Asofitu o le Toe Afio Mai. O paia na ma mamalu o lo o tapuaia faiva aua se ai o si o tatou itumalo, ae se i liliu ane i tofiga ma valaauina. Malo faafetai, faafetai le tapuai.

Lau Afioga i le Fofoga Fetalai, e maea le tatou Fonotaga i le aso nanafi ua maea uma mai nai manatu ma fautuaga na tuuina mai, amata mai lava i le

Susuga i le Taitai o le Itu Agai. O le a ou amata atu i lau fesili lea na tuuina mai i le tai \$300 foi lea na fai faa-one off e le tatou Malo. Faafetai. E ese le manaia o fautuaga a lau Afioga a le Sui Taitai o le Itu Agai. Malo faafetai. O lea foi faatoa ou toe taumanatu ua leva ona e nofo mai le nofoa lena o le Sui Taitai ae te le i Taitai, a o lea pei faatoa aliae le tele o manatu lelei, malo faafetai le lagalaga. O lea faatoa...

**Tofa Ale Vena Ale (Faleata 4):** Lau Afioga i le Fofoga Fetalai...

**Afioga FALEOMAVAEGA TITIMAEA TAFUA:** Ia, e i ai se mea ua faalavelave ai?

**Tofa Ale Vena Ale:** Lau Afioga i le Fofoga Fetalai, ou te tulai atu ma le faaaloalo e faamanatu i le Afioga i le Taitaifono, e le o toe Sui Taitai le Tofa i le Tuiatua, o la ua Taitai o le Itu Agai lau Afioga ma le faaaloalo lava. Leaga o lea e fai ma fesasiai sona finagalo i le Sui Taitai, a o lea ua avea ma Taitai i le finagalo o le Palemene lau Afioga. Ma le faaaloalo lava. Faafetai.

**FOFOGA FETALAI:** Ia, atonu o lea ua tau maua mai le saunoaga a le Taitaifono, pei o la e sa amata mai i le Sui Taitai, ae o lea ua toe taunuu mai o lea ua Taitai. Ia, lau Afioga i le Taitaifono, ia o la ua aumai le fautuaga a le sui usufono mamalu.

**Afioga FALEOMAVAEGA TITIMAEA TAFUA:** Faafetai. Se i tau lavapapale mai ma tau maua mai le iuga o faamatalaga, le taimi a o Sui Taitai. O le faamatalaga lea e fai atu, malo faafetai, faafetai lagalaga i manatu lelei. O le taimi a o e Sui Taitai, o i ina na tau avatu ai se faamatalaga, ae ese le manaia o fautuaga. Ae fetau lelei lau fautuaga, ae mo le silafia e lau Afioga, o le taimi lenei ma le faatulagaga o le tatou lalolagi i lona tamaoiga i lona aafia, ia o lo o faapena foi ona aafia ai si o tatou atunuu. Ae manaia le fautuaga. Masalo e le o sao le taimi e aumai ai, ae...

**Tofa Hon Lauofo Fonotoe Nuafesili Pierre Lauofo (Taitai o le Itu Agai):** Lau Afioga i le Fofoga Fetalai o le mea e fia faasao.

**FOFOGA FETALAI:** Ia se i tulai mai lau Afioga i le Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** O mea ia sa... Masalo ai o pasene ia sa ou talanoa ai ananafi lea e saunoa mai ai le Afioga i le Taitaifono. O mataupu na e pulea lava e le Komiti Faatonu ma le Pulega i le faafoefoeina o le tatou NPF, ia o latou la e fuafua lava mai lea taimi i lea taimi pasene talafeagai. Ae le o le taimi muamua lea ua faaleoina ai fautuaga ia, sa faaleo foi i isi tausaga ma Paeaiga ua tuanai, ae peitai, e ese foi le

silasila a Komiti Faatonu sa i ai. Ia o lea foi la ua toe avatu, ma le fautuaga ma le tuualalo, se i toe silasila ane, a o le Sui Taitai, e leai e le o au le Sui Taitai, o le Afioga ia Fiaame sa Sui Taitai i lenei foi Itu i lena Paeaiga na tuanai atu. Ma le faaaloalo lava.

**FOFOGA FETALAI:** Ia, tulai mai lau Afioga i le Taitaifono.

**Afioga FALEOMAVAEGA TITIMAEA TAFUA:** Malo faafetai. Faafetai lava i lau Afioga i le Taitai o le Itu Agai. Leai e ala lava ona tau fai atu se faamatalaga ona o le taimi e aumai ai le finagalo ma le fautuaga ma le tuualalo. E le o talafeagai. Ae malo faafetai.

Se i oo atu i le tulaga pei ona e taua i le penisione foi lea a Niu Sila ma tatou i inei. O le tulaga lea e i ai tatou penisione, o lo o ua i ai lava, ua uma ona faatalatalanoa ma le Ofisa, o lo o ua i ai latou fesootaiga ma le vaega lea i Niu Sila i le penisione a Niu Sila ma le tatou penisione i inei, a faapea e te penisione i inei e toe penisione i Niu Sila, ua i ai le fetuunaiga, e i ai le fesootaiga e toese le penisione a oe lea e maua i Niu Sila mai lau penisione lea e maua i inei pe a faapea ua tali faatasi i le latou lea va nonofo ai. Ae a faapea lava o lea ua tali le penisione a Niu Sila ae le o talia i inei, ia e tumau lava le tulaga lea i le tatou penisione. O le tatou penisione lena i Niu Sila na lavea mai lau saunoaga.

O le tatou vaa foi lea e pei ona e finagalo... Manaia foi lau fautuaga i le taavale a le aumatutua pe a malaga i le va o Mulifanua ma Salelologa faapea foi Salelologa ma Mulifanua i le fesoasoani a le Malo. E pei lava o le a faataatia atu i le Taitaifono ma le Komiti le tulaga pei ona e taua, o le a maua atu se tali lelei e faafiafiaina ai le tatou aumatutua pe a oo atu i le taimi lea.

O lo o lavea atu ai foi ma le Afioga ia Tuuu Anasii i le tulaga lea pei ona fesiligia i le tulaga o e foi ia e gasegase ae tuua le atunuu i tulaga tau faaauau foi lea o latou penisione maua. O le tulaga lea o lea o le a tuufaatasi foi e avea i lalo o se fautuaga i le Taitaifono ma le Komiti e silasila i ai i lea vaega ma maua atu se tali i se taimi lata mai i se tatou fonu i le lumanai.

O le tuualalo a le sui usufono mo Aiga i le Tai i le siitia o penisione foi ia a tatou auvaega matutua i le va lea, e le o aofia le va lea o Manono ma Apolima i le feoi o le vaa, ia o lea o le a tuufaatasi i totonu o se fautuaga e momoliina atu i le tatou Komiti pei ona ou taua.

O le tulaga o le fautuaga a...

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eeseese):** Lau Afioga i le Fofoga Fetalai...

**FOFOGA FETALAI:** Malie le Taitaifono se i tuu atu le avanoa i le Afioga i le Minisita mo Galuega Tetele.

**Tofa Hon Olo Fiti Afoa Vaai:** E faamalulu atu i lau Afioga i le Taitaifono i le tulaga i le mataupu tonu lava lea o totogi o pasese o tagata matutua lea e fai i lalo o le penisione. O le tulaga lava ia, e leai se papuipua o lena itu ona o le tulaga foi i matua matutua.

Na pau lava se mea e faamanatu atu ua lelei foi se i faamanatu atu i lau Afioga i le Taitaifono, se i tulituli atu le NPF e tau totogi atu nai mea na i o i le matou Kamupani Vaa, e pei o tuliga foi ia lea e fai nei i le mea lena, ae le afaina le mea lena. E oo foi i le mea lea sa saunoa i ai le Sui Fofoga Fetalai i pasese foi o tagata matutua i Manonotai, ia e faapena lava ona faatino pe afai e totogi atu e le NPF nai seleni ia i le tatou Kamupani Vaa. Ma le faaaloalo.

**FOFOGA FETALAI:** Ia, saunoa mai lau Afioga i le Taitaifono.

**Afioga FALEOMAVAEGA TITIMAEA TAFUA:** Malo faafetai. Tasi lea vaega taua sa oo i ai le faatalatalanoaga pei ona saunoa lau Afioga. Sa fesiligia le vaega lea o le penisione a tagata matutua i le NPF i sona mafuaaga e tuai ai ma faatuai, e le gata i pasese o vaa ma le falemai. O le tali na aumai e... masalo pe afai o faafofoga mai le Ofisa iinei o le tatou Penisione o le Aumatutua, o le tali na aumai lau Afioga i le Minisita, e pei lava o lea e tuuaia le tuai atu ona avatu o pili, o lo o nofonofono ma tapena latou siaki. O le tali lena na tuuina mai, ae pei e mafua o le tuai atu o tou pili foi ia e avatu, e lavea ai ma lau Afioga i le Minisita o le Soifua Maloloina, aua na lavea uma i le faatalatalanoaga ona o le tuai na faatino le tele o tiute. E pei o le mafuaaga lena pe a o i ai i le... o le mafuaaga e mafua mai i le tuai atu o tatou pili lau Afioga. Se i toe tagatagai i ai po o fea o i ai le sao i le tulaga pei ona e taua.

Ae se i ou oo mai i le sui usufono lea o si o matou itumalo o Vaimauga. E ese le manaia o le lagalaga i mea lelei. O le tulaga tau i faleaiga foi ia mo le aumatutua, e silafia foi e lau Afioga, e faaeteetegata lava le soifuaga tausi o tagata matutua i mea ia o faleaiga, o lo o i ai lava e o lo o latou tapenaina taumafataga o e matutua, aua le soifua maloloina. Ae manaia le fautuaga, se i tilotilo i ai, faataatia mai.

Ou te masalo o le tele o vaega ia na fesiliga e le tatou... lea ua oo uma atu i ai tali, ua mafai ona tali uma atu i...

**Afioga Sulamanaia Fetaiai Tauilili Tuivasa (Vaimauga 1):** Lau Afioga i le Fofoga Fetalai...

**FOFOGA FETALAI:** Ia malie lau Afioga i le Taitaifono se i tuu atu le avanoa i le sui usufono mo Vaimauga 1.

**Afioga Sulamanaia Fetaiai Tauilili Tuivasa:** Masalo e le faalavelave lava leni itumalo pe a malele foi le Taitaifono o le Komiti o Tupe, ae na o sina tulaga sa taua i lau lauga le tulaga lea i nai faamanuiaga mo nai tagata matutua i faleaiga. O lea na saunoa le Taitaifono i le feagaiga lea e fai i penisione a o tatou tagata matutua lea e maua faamanuiaga i Niu Sila ma e e omai i inei i Samoa. O lea foi la e i ai le feagaiga lena e aveese se vaega o latou penisione Niu Sila pe a faapea o lea foi e tala i inei. Ia e pei e faapena se lagona lea na avatu ai ina ia... a ua le mafai ona taumafa o tatou tagata matutua i ni faleaiga, ae a le taimi o latou aso fanau. Le taimi foi lea ua atoa i ai se aso fanau o... ia ona o lea aai i le faleaiga lea. E pei e faapena foi le faiga lea e fai e Niu Sila, e fai fua ai ma taumamafa fua ai i nai o latou asofanau lau Afioga. Aua o lea e matau atu o lea e lava a lau faasoa, a o le tuai atu o pili foi na e totogi ai vaa.

Ia pei o le agaga lena sa avatu ai le tuualalo i faleaiga, leaga o nai isi o tatou tagata matutua e seasea omai i ni faleaiga, aemaise tatou mamao i tua. Na o matou lava i Apia lea e aumai nai... ae pei e manaia le agaga lena e aumai ai nai tina ma tama matutua i nuu i tua se i faatausasami i faleaiga, ae totogi atu e le NPF nai faamanuiaga. Ma lou faaaloalo lava lau Afioga i le Fofoga Fetalai.

**FOFOGA FETALAI:** Se i tulai mai lau Afioga i le Taitaifono.

**Afioga FALEOMAVAEGA TITIMAEA TAFUA:** Malo faafetai. O le mea lea e lelei ai le sui usufono lea mai Vaimauga, e vave tele e i ai nai pioga foi ia e oso ai. Lau Afioga e le i lavea mai faleaiga i le tulaga lea, ae peitai ane, o lea foi la o le a lavea lau talosaga ma lau tuualalo, faataatia mai o le a se i tilotilo i ai ma tuuina atu i le tatou Komiti. Ma le faaaloalo lava.

Ou te manatu lau Afioga i le Fofoga Fetalai, na pau ia o nai vaega na tapa e fia malamalama i ai sui usufono mamalu o le tatou Palemene. Ma le faaaloalo lava.

**FOFOGA FETALAI:** Malo saunoa i lau Afioga i le Taitaifono. Ia, e leai na aafia le saunoaga a Vaimauga 1 i faleaiga ae le i taua ai la ni aso fanau i lana saunoaga muamua. A o lea faatoa taua mai nei, ae faamau ane i ina le fautuaga a le sui usufono mamalu.

Ia se i tulai mai lau Afioga i le Sui Minisita.

**Afioga Hon LEOTA LAKI LAMOSITELE (Sui Minisita o Tupe):** Faafetai mo lou avanoa i lau Afioga i le Fofoga Fetalai. E faatalofa atu foi i le paia o le Maota aemaise foi le mamalu o Samoa o lo o faafofoga mai. Ua ou tulai atu ma le faaaloalo e toe faapoopo atu i le talifuaitau a le Taitaifono e tusa ai ma le mataupu o lo o talanoaina.

Ae ou te talitonu, ua maea lava ona tolaulau atu e le Afioga i le Taitaifono vaega uma ia ua uma ona laga mai i saunoaga a sui usufono. O lea foi ua matau atu foi e le tatou Ofisa o le Penisione mo Tagata Matutua talosaga o lo o tuuina mai. O se tasi o ia talosaga e aofia ai le toe... aua o lena foi tou te silafia o le faatupeina uma o le vaega lea e auala mai i le tatou Malo. O le mea la lena, ae taatia mai se i silasila foi i ai le Malo i le tulaga o lo o faataatia mai ai isi manaoga faapitoa ina ia faaleleia ai le tatou auaunaga mo le au penisione matutua, faapea foi ma nisi faamanuiaga tau tupe faaopoopo. Ae taatia mai, o lea lava e fai atu lava le faasoia a le tatou Malo, a faapea e tau ane ai, o le a faapena lava ona tatou toe felogonai agai i le mataupu lea, aua o lea ua uma ona pasia le isi vaega faatei lea, le faamaite lea na pasia i le tatou Tala Faaopoopo o le Tupe lea o le a toe totogi mai. O le a faapena foi ona toe silasila i ai le Malo ae tatou te le i oo atu i le isi vaega o le faamatalaga foi o le Tala o le Tupe mo le tausaga fou.

Ia o se toe soso atu lea i le paia ma le mamalu o le Maota i lenei itula. Ae ou te talitonu ua maea atu foi i ina le mataupu ma le aotelega o le folasaga i lenei taeao e faatatau i le penisione a tagata matutua. Ma le faaaloalo lava.

**FOFOGA FETALAI:** Malo faafetai, malo saunoa i lau Afioga i le Sui Minisita o lo o vaai le tatou Faalapotopotoga mo lenei vaitaimi.

Ou te tapa lau Afioga i le Taitaifono mo le lafo.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa o le P.P.2022/2023 Nu. 14, Lipoti a le Komiti o Tupe Maua ma Tupe Totogi i le P.P.2020/2021 Nu. 78 ma le P.P.2021/2022 Nu.33, Lipoti o Faamatalaga ma Tala o Tupe a le Faaputugatupe o Faamanuiaga mo Tagata Matutua o Samoa mo Tausaga Faaletupe 2019/2020 & 2020/2021.*

Ma le faaaloalo lava.

*Faaluaina e le sui usufono mo Lefaga ma Faleaseela ma le sui usufono mo Aana Alofi 3.*

*Na faamaonia le lafo.*

**FOFOGA FETALAI:** Ou te tapa ma le faaaloalo lau Afioga i le Sui Minisita mo le lafo.

**Afioga Hon LEOTA LAKI LAMOSITELE:** Lau Afioga i le Fofoga Fetalai ou te faatu atu le lafo, *Ina ia faamaonia e le Fono Aoa Tali a le Malo i Fautuaga a le Komiti o Tupe Maua ma Tupe Totogi e pei ona ou tolaulauina atu.*

*Faaluaina e le Minisita mo le Soifua Maloloina.*

*Na faamaonia le Tali a le Malo.*

**P.P.2022/2023 NU.15, LIPOTI A LE KOMITI O LE VAEGA TAU LE VA FEALOAI I LE P.P.2021/2022 NU.8, LIPOTI FAALETAUSAGA A LE FAALAPOTOPOTOGA O TAU MO FAALAVELAVE FAAFUASEI MO LE TAUSAGA FAALETUPE 2019/2020**

**P.P.2022/2023 NU.78, TALIA LE MALO I LE P.P.2022/2023 NU.15, LIPOTI A LE KOMITI O VAEGA TAU LE VA FEALOAI I LE P.P.2020/2021 NU.8, LIPOTI FAALETAUSAGA A LE FAALAPOTOPOTOGA O TAU MO FAALAVELAVE FAAFUASEI MO LE TAUSAGA FAALETUPE 2019/2020 – ILOILOGA**

**FOFOGA FETALAI:** Tulai mai lau Afioga i le Taitaifono o le Komiti o le Vaega Tau le Va Fealoai.

**Afioga LAUMATIAMANU RINGO M. PURCELL (Taitaifono Komiti o le Vaega Tau le Va Fealoai):** Lau Afioga i le Fofoga Fetalai ou te faatu le lafo, *Ina ia faautagia e le Fono Aoao le Lipoti a le Komiti o le Vaega Tau le Va Fealoai, o lo o tuuina atu ai Sailiiliga, Fautuaga ma Iugafono.*

*Faaluaina e le sui usufono mo Salega 1, sui usufono mo Aana Alofi 3 ma le sui usufono mo Aana Alofi 1.*

*Na faamaonia le lafo.*

**FOFOGA FETALAI:** Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga LAUMATIAMANU RINGO M. PURCELL:** Ia, ou te ofo faatalofa atu i lenei taeao i le afio o lau Afioga i le Fofoga Fetalai, e faapea foi ona faatulou ma faatalofa atu i lau Afioga i le Tamaitai Palemia, le mamalu o le Kapeneta i alii ma tamaitai, aemaise o le vasega o Minisita Lagolago.

E faatalofa atu foi i lena Itu o le Malu i lau Afioga i le Taitai o le Itu Agai ma le mamalu o sui usufono mamalu uma o le Fono Aoao.

E faatalofa foi i le itu fefaatauagai i le afio o le Afioga i le Faamasino Sili aemaise foi o le vasega o Faamasinoga. E faatalofa foi i Le Ao Mamalu o le Malo aemaise o lau Masiofo. Le Sui o le Fono o Sui Tofia faapea lou faletua. E le faagaloina foi le afifio o le aiga Sa Levi i so o se Fatafaitaulaga o lo o

tulivae i le ao ma le po aua se manuia o si o tatou atunuu. E faatalofa foi i le afifio foi o Ofisa Sili o Pulega o Matagaluega aemaise foi Faalapotopotoga Tumaoti. E faatalofa foi i le Failautusi aemaise o le mamalu o le aufaigaluega o le Fono Aoaofaitulafono.

E le faagaloina foi le mamalu o Samoa mai lava i le papa i tau, seia paia le papa na susu. Le Tapuaiga a si ou itumalo o Safata 2 aemaise le mamalu o Samoa i atunuu e mamao.

Ae o le a lilifa ia nai Utumalie le faiva na i Faasalele ae lolou fisaga ina ua usu i tiaseu, ina ua goga e siu o Amoa ae fisaga ai le Lailua.

Lau Afioga i le Fofoga Fetalai, ua i lumamea nei le lipoti o le taunuuga o sailiiliga a le Komiti tau le Va Fealoai i le P.P. 2021/2022 Nu 8. Lipoti Faaletausaga a le Faalapotopotoga o Tau i mo Faalavelave Faafuasei mo le tausaga faaletupe 2019/2020.

Ae tau lava ina ou pai i le aotelega, a o itu taua foi na matauina e le Komiti i taimi o ana iloiloga.

Lau afioga i le Fofoga Fetalai, na amata sailiiliga a le Komiti i le lipoti a le Faalapotopotoga o Tau i ma Faalavelave Faafuasei i le aso 13 o Me 2022. Ma sa auai le Ofisa Sili ma lona auvaa e folasia le aotelega o galuega faatino sa feagai ma le Faalapotopotoga.

Aotelega o Sailiiliga, oototoga o galuega faatino: O matafaioi ma tiute tauave o le Faalapotopotoga o Tau i ma Faalavelave Faafuasei, ua faatulafonoina i lana Tulafono o Tau i ma Faalavelave Faafuasei 1985 ma teuteuga o lana Tulafono Toe Teuteu, o Tau i mo Faalavelave Faafuasei 2003, 2009 faapena foi le 2009.

O le tausaga faaletupe 2019/2020, na faatautaia ana galuega ina ia ausia lana lana vaai taulai ina ia mautu faiga faavae tau tau i faalavelave faafuasei, ma le vave tali atu i manaoga o i latou o lo o ua aafia. E le gata i lea, a o le manulauti, ia taulamua le Faalapotopotoga i le faaititia o aafiaga lautele, faalenatura ma le faaletamaoiga o faalavelave faafuasei o lo o aafia i lalo o mataifai faaletulafono a le Faapotopotoga e ala atu i le uunaia o le saogalemu, toe faaleleia, ma le faagaioiga o talosaga o tau i mo faalavelave faafuasei.

Na faamauina e le Komiti le tausaga faaletupe 2019/2020 e 239 talosaga na resitaraina mo le tuuina atu o tau i ma ua auiliili atu i le lipoti, i le faatulagaina e le Faalapotopotoga o ia tau i mo nai o tatou tagata.

### **Uunaia o le Saogalemu:**

Lau afioga i le Fofoga Fetalai ma le mamalu o le Fono, o se tasi o matafaioi a le Faalapotopotoga ACC o le uunaia o le saogalemu e ala i ana galuega faatino e pei ona faamauina i Sailiiliga a le Komiti.

**Aotelega o Faalavelave Faafuasei:**

E pei ona faamauina i le Lipoti ua i le Tulafono a le Fono Aoao Faitulafono o faamaumauga ua folasia i fausaga ua faapitoa o femalagaaiga. E tusa ma le 41 faalavelave, ma e 49 le aumanunua ma le 15 o i latou na maumau soifua i le tausaga faaletupe 2019/2020.

**Faamatalaga o Tupe:**

Na faamauina e le Komiti, le tuuina mai o le lipoti o Pule ma Suetusi Sili, i le faamatalaga o tupe a le Faalapotopotoga ACC. I lea itu, o le aotelega o tupe maua, e tusa ma le \$22.6 miliona, tupe na mafai ona aoina e le ACC i le tausaga faaletupe 2019/2020.

E \$5.3 miliona tupe faaalu a le Faalapotopotoga i le tausaga faaletupe 2019/2020, ma ua faamauina atu i le lipoti a le Komiti. Sa faamauina foi ni atinae tetele sa faapena ona faatinoina i le tala faaletupe i le 2019/2020. O galuega sa faapena ona faatino o le toe atoina lea o le maketi i Fugalei, faapena foi le foai na toe tuuina atu i le Malo e fesoasoani i le Kamupani a le Samoa Airways e \$1 miliona, ma le isi miliona e tasi na tuuina atu e fesoasoani ai i le Malo i le Koviti-19. E \$4.7 miliona Samoa sa faapena ona faatauia ai le fanua i Otahunu i Niu Sila aua le vaega o le Esetete Tausi. O itu taua na matauina e le Komiti, lau afioga i le Fofoga Fetalai, o le fausiaina o fautuaga a le Komiti, na afua mai nisi o mataupu ma itu na matauina e le Komiti ua tuuina atu i le lipoti.

**Lafoga mai penisini, suauu, fale ma tagata faigaluega:**

Na maua e le Komiti o se tasi o lafoga e aveese mai totogi o tagata ma fale faigaluega, e 1% e aveese mai i le falefaigaluega po o le employer. E 1% e toesea mai le totogi o le tagata faigaluega, ae 5% e aoina mai penisini ma suauu e faaaogaina e taavale afi ma vaa.

**Tau e tuuina atu mo faalavelave faafuasei:**

Lau afioga i le Fofoga Fetalai, e na o faalavelave tau taavale e saofāgā uma ai tagata lautele i le tau. O nisi faalavelave faafuasei, faataitaiga e pei o le pau i le laau, e na o tagata faigaluega po o totogi ACC e maua tau. O sailiga o Komiti, na maua ai o i latou ua maliliu ae o lo o totogi ACC e \$4,000 faamanuiaga e maua. O isi tau tau seleni na taua e le Faalapotopotoga a maliu le tama faigaluega a le aiga ae tuua na o le tina e le faigaluega ma le la fanau, e agavaa i le \$20,000 o le faalagolagomaga atoatoa. Ae afai e maliu le tama ae tuua na o le tina e faigaluega ma le la fanau, e agavaa i le \$16,000, o le faalagolagomaga le atoatoa. O le eseese o lo o faigaluega le tina e tua i ai le fanau ma le aiga. Na maua e le Komiti o nisi o gasegase totogi lafoga ACC e tuga manuaga, ma ua faamaonia e le fomai togafitiga i atunuu e mamao, e tatau ona \$150,000 i le faatupega, ae afai ua sili atu ona faasee lea

i le Kapeneta mo le iloiloga ma le faamaonia o tupe, ua sili atu i luga mai le tupe ua taua.

Ua faamauina foi e le Komiti le mafai lea ona resitala ia autaaalo i so o se taaloga, e fesoasoani le ACC i manuaga e aliae mai i tagata taaalo pe a faamanualia.

**Faamanuiaga mo le aufaisaofaga a le Faalapotopotoga:**

Lau afioga i le Fofoga Fetalai, na matauina e le Komiti le sololelei ma le faatupulaia o vaegatupe a le Faalapotopotoga e tusa ai ma faamatalaga o tupe i le tausaga faaletupe 2019/2020. Ona o lea, o le vaai a le Komiti ua toatele le atunuu o lo o totogi lafoga, aepeitai e ae lava i fanua le folauga o le ola tautua i galuega, e le i aafia lava le soifua i se faalavelave faafuasei. E manatu le Komiti e ao ona silasila le Faalapotopotoga i le itu lea, i se faiga faavae e ono maua ai e o tatou tagata faigaluega o totogi ACC, ua iu le auaunaga i le faigaluega po o le litaea se 10% o lana lafoga na totogi mai i le taimi atoa a o faigaluega po o se galuega mau totogi. Ua folasia atu i le lipoti ua tauaaoina e le Fono Aoaofaitulafono, le atoaga o nisi itu taua na tagai i ai le Komiti, ae lau afioga i le Fofoga Fetalai, o fautuaga ua folasia.

**FAUTUAGA:**

I le maea ai o le iloiloga a le Komiti o le Vaega Tau le Va Fealoai, na faaiugafonoina ai, ina ia fautuaina le Malo e faapea;

E fautuaina e le Komiti le Faalapotopotoga ma le Malo ina ia silasila i le fausia ai o se faiga faavae mo faamanuiaga o tatou tagata faigaluega ua iu le auaunaga (litaea) pe sili atu, ina ia mafai ona maua se 10% o le aofai o lana lafoga na aoina talu ona faigaluega.

E fautuaina e le Komiti le Faalapotopotoga ina ia faataatitia nisi fuafuaga ma taiala mo ana polokalame faalauiloa ma galuega faatino, ina ia faaaauina pea le tuuina atu o nei auaunaga i le vaitau o faamai.

E fautuaina e le Komiti le Faalapotopotoga ina ia faamalolsia le tuuina atu o fesoasoani i nisi o itutino ma Matagaluega o lo o latou faatinoina le puipuga o le saogalemu mai faalavelave faafuasei.

**IUGAFONO:**

I le maea ai o le iloiloga a le Komiti, na faaiugafonoina ai ina ia fautuaina le Fono Aoaofaitulafono, ia faamaonia ma faautagia lana Lipoti ma Fautuaga i le P.P.2021/2022 Nu 8, Lipoti faaletausaga a le Faalapotopotoga o Tau mo Faalavelave Faafuasei tausaga faaletupe 2019/2020.

Ma le faaaloalo.

**FOFOGA FETALAI:** Malo faafetai i le Taitaifono ma la outou Komiti o le Tau'i o Faalavelave Faafuasei mo le folasaga malamalama o lea foi ua faafofoga le paia o le Maota, malo galulue faafetai mo le galuega maeaea. O le taimi ou te tapa lau afioga i le Tamaitai Palemia, o le Sui Minisita foi o lo o vaia le Tau'i o Faalavelave Faafuasei mo le tali a le Malo.

**Afioga Hon FIAME NAOMI MATAAFA (Sui Minisita o Tau'i mo Faalavelave Faafuasei):** Faafetai i lau afioga i le Fofoga Fetalai mo le avanoa. Ae le i tolaulauina tali a le Malo, e muamua lava ona momoli atu le faafetai i le talosaga siitia i lenei taeao, e taimuaina ai le tatou Fono e lau afioga. E faapea foi ona tuuina atu i le Alii le faamoemoe i le faigamalaga e pei ona e fofogaina. Faafetai ua tatou aulia mai lenei aso i le faaauauina pea o le tatou galuega aemaise o le tagofia ma le talanoaina o lipoti a Komiti o le Palemene. Mo nisi o tatou ua leva ona i ai i le Maota, atonu o se laasaga lea ua fai foi sina umi e lei toe faatinoina, e maua foi sa fai se feiloaiga a le Palemene i le vaiaso ua tuanai, e faapea ona faatalatalanoaina ai le faamoemoe lenei. Ou te manatu o se laasaga taua, e ui o lea o lo o faagasolo a tatou lipoti i le 3 tausaga ua tuanai, e faamoemoe foi i ala o galuega e mafai foi tatou fetuunaia lipoti pe tuu faatasi tausaga, ina ia tuutuu mai ai i luma le tatou galuega. Ae o le mea sili ua mafai ona faataatia lipoti faaletausaga, iloilo e sui o le atunuu, ma fofogaina e tauala i lenei Fonotaga ua alo atu i ai le Palemene.

Ua faamalo foi le tofa i lau afioga ma le tatou Ofisa o le Fono mo le fuafuaina o ia galuega taua o le Palemene. E momoli atu ai le faamalo i Taitaifono ma tatou Komiti eseese, aemaise foi le autovaa mai o le afaigaluega i itutino eseese, e faapea ona faagasolo le faamalamalamaina o le faatinoina o galuega a le Malo mai i lea taimi i lea taimi. Faafetai foi i lau Afioga i le Fofoga Fetalai, maua i nisi o saunoaga i le tatou fonotaga lenei finagalo faaalua o sui ua toe taluu mai le sailiga malosi i Niu Sila i le amataga o le tausaga. Faafetai tele i lau Afioga ma le mamalu o sui o le Palemene mo talosaga siitia, faafetai i le Alofa o le Atua ua aoga togafitiga a fomai ua toe faafoiina mai le malosi, faafetai tele lava. Ia ona faaauau ai lea o sa matou faamatalaga lau Afioga i le Fofoga Fetalai, ou te tolaulauina Tali a le Malo e faatatau i fautuaga a le Komiti o Vaega tau i le Va Fealoai e pei ona folasia manino nei e le Taitaifono.

### **Fautuaga 1**

E silasila i le fausia o se faiga faavae mo faamanuiaga mo tagata faigaluega ua iu le auauanaga (lita) pe sili atu ina ia mafai ona maua se 10% o le aofai o lana lafoga na aoina talu ona faigaluega.

## **Tali**

O matafai oi atu a le Faalapotopotoga o loo i ai lea i tulafono o Tau'i ma Faalavelave Faafuasei 1989 ma ona tulafono toe teuteu. E moni e le o i ai se vaega o nei tulafono e maua ai nei faamanuiaga o tagata sa faiagluega a ua litaea aua o loo iai le isi itutino o le Malo o loo gafa ma lea faamanuiaga. Aepeitai o le a tuuina atu le fautuaga i le Ofisa o le Loia Sili o le Malo mo le iloiloga o se teuteuga o le tulafono Tau'i mo Faalavelave Faafuasei e tagai iai e faamatuu atu se pasene mo i latou ua litaea e pei ona fautuaina.

## **Fautuaga 2**

E faataatia nisi fuafuaga ma taiala mo ana polokalame faalauiloa mo galuega faatino ina ia faaauuina pea le tuuina atu o nei auaunaga i lenei vaitau o faamai.

## **Tali**

E faaauu galuega faalauiloa o le saogalemu e pei ona fuafuaina mo soo se tausaga faaletupe, ona o se tasi leni o galuega patino a le faalapotopotoga o loo mulimulitai foi i taiala mo polokalame faalauiloa e faaogaina ai ala leo poo leitio ma ala ata poo televise o loo agai faatasi foi le ACC, ma ana paaga i le faalauiloa o le saogalemu e pei le pepa i faamatalaga o loo faapipii atu.

## **Fautuaga 3**

E faamalosia le tuuina atu o fesoasoani i nisi o itutino a Matagaluega o loo latou faatinoina le puipuiga o le saogalemu mai faalavelave faafuasei.

## **Tali**

O le tala faatatau o le tupe 2019/2023 o fuafuaga o galuega faatino a le faalapotopotoga i tausaga uma o loo iai fesoasoani tau tupe a le faalapotopotoga i ana paaga, ma isi itutino o le Malo i galuega e uunaia ai le saogalemu ma puipuiga mai faalavelave faafuasei. O nisi nei o Ofisa o le Malo ma faalapotopotoga tumaoti sa fesoasoani iai le faalapotopotoga. Matagaluega o Pisinisi Alamanuia ma Leipa, Matagaluega o Galuega Felauaiga ma Atinae Tetele, Matagaluega o Leoleo Falepuipui ma le Ola toe Fuataina, Matagaluega o le Soifua Maloloina, Matagaluega o Tupe mo le fesoasoani i le Tala o le Tupe, Matagaluega o Felauaiga i Luga o le Laeleele, Pulega o Tineimu ma Faalavelave e tutupu Faafuasei, Pulega o Taaloga a le Pasefika, O le SPINAL Network of Samoa, O Leitio 2AP, FM 540, Talofa FM ma le EYESPY FM 87.5 ma Televise o le TV1, SBC, TV 4 Upumana ma le TV8 a le Iunivesite. E talitonu le agaga o le a tatou galulue pea mo se Samoa saogalemu ma le manuia i le lumanai.

Ma le faaaloalo lau Afioga.

**FOFOGA FETALAI:** Malo faafetai mo le saunoaga aemaise foi o le faamalamalamaga atili o Tali a le tatou Malo, e tusa o fautuaga a le Taitaifono ma lana Komiti. O le mea lea malo faafetai, lea foi ua faafofoga maua lo tatou maota i saililiga ma fautuaga aemaise foi o le tali a le tatou Malo i le Lipoti a le Taitaifono ma lana Komiti. Ia o le avanoa lenei mo le tatou Maota i ni finagalo e fia faaalua e tusa ai ma le Lipoti, ia matau atu o lea lava ua muamua mai lau Afioga i le Taitai o le Itu Agai o le avanoa lea lau Afioga i le Taitai o le Itu Agai.

**Tofa Hon LAUOFO FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai lenei foi taeao fou ua maua se avanoa. Ua faamalo le soifua laulelei, lea foi ua maea ona e fana le u i le vateatea, fai lena mo i tatou lenei taeao aua lo tatou Matai Sili o i le lagi. O lo o lagimaina foi le soifua o le Afioga i le Palemia lenei i taeao, faapea foi Afioga i Minisita Lagolago tainane foi le ee mai o le Afioga i le Sui Fofoga Fetalai ma Minisita Lagolago, faapea foi le paia maua o lea itu o le Maota, le afifio atu o Afioga i sui usufono mamalu, le tapuaiga maua o Ofisa Sili o Pulega o Matagaluega ma Faalapotopotoga a le Malo, faamalo foi le taupati mai aua foi le faatinoina o le tou pitolaau lagolagosua i le Galuega a le tatou Palemene ma le tatou Malo. Le tapuaiga a Samoa, faamalo le folau ia faapea foi le itupa gafua, auauna tofoti a le Atua faatalofa atu i le suafa manumalo o Iesu i lenei foi taeao fou. Lau Afioga i le Fofoga Fetalai manatu e leo po se lilo tasi lenei Faalapotopotoga o le tatou Malo o loo tele seleni o loo iai, i le tulaga o le latou tupe maua mai i levy toese mai i totogi o tagata faigaluega o le atunuu. Ma o loo matauina pea se tulaga lelei mai lea tausaga i lea tausaga pei foi la o le tausaga faaletupe ma le lipoti o loo tatou talanoaina i lenei taeao 2019/2020, o loo maua ai pei foi ona saunoa le Afioga i le Taitaifono o loo maua tupe faasili e \$17,3309 poo se tulaga faapena. E momoli atu ai le faamalo i le Afioga i le Ofisa Sili o Pulega aemaise le Komiti Faatonu, le Afioga i le Taitaifono o le Komiti Faatonu o latou ia o loo faafoeina le tatou Faalapotopotoga lenei. Malo le galulue, ia faamanuia pea le Atua i o outou faiva. O matauina le tele o faalavelave faafuasei lau Afioga, ae pei e mafua mai lava i le faatamala, faatamala o tagata i fale faigaluega i le faatinoina o galuega ia faatasi ai ma faalavelave faafuasei e tupu i luga o auala tetele o le tatou atunuu, e mafua mai lava i le ava malosia lea matau atu le Lipoti e mafua ai le tele o isi mau faalavelave faafuasei o loo tulai mai. Ae e faamalo le galulue lea foi ua tilotilo atu i le Lipoti lenei, tasi lenei mataupu tele tausaga o faatalanoaina pea o se tau'i poo se fesoasoani mo tagata taaalo, tele tagata taaalo o le tatou atunuu aemaise lava i le vaega lea o le talavou poo youth. O i latou ia o loo tele na taaalo i taaloga, e pei foi ona silafia i lenei vaitau tasi lea tupe lelei ua maua lenei foi vaitau ua tatou i ai, mai taaloga aemaise pe a maua ia mo mea o avanoa e taaalo ai faapolofesa i tulaga o taaloga eseese ae o le fesili la lau Afioga ile

Taitaifono o le Komiti lea vaega po o lea le faatinoina? Aua pei o lea e maua o le resitala mo kalapu, pe resitala atu ma latou ia o tagata taaalo? ae pe faafefea le totogiina pe totogi se latou levy pei o isi tagata faigaluega aua lea totogi le 1% o levy mai totogi i tagata faigaluega o loo galulue i totonu o le atunuu. Tulaga i agavaa, o a tonu ia tulaga o aiaiga o le agavaa o le tagata taaalo e mafai ai ona agavaa mo le a foi faamanuiaga mai le tatou Faalapotopotoga? Ua faafetai le tulaga lea ua maua o le tupe a le tatou Faalapotopotoga Tau i Faalavelave Faafuasei lea na faatau ai le tatou fanua lea i Otahuhu i Niu Sila, e pei ona aumai i le lipoti a lau Afioga ma le Komiti faaaluaaina ai le WS\$4.7 miliona. O le fesili i lea vaega lau Afioga i le Taitaifono, po o le a le faiga lea e faaoga ai le tatou fanua lea aua e pei o lea e maua i le Lipoti e faaoga faamaketi, o lona uiga o lea faatau i tupe a le tatou ACC a o loo faagaioi e le STEC. O le a le tulaga o le faagaioiga o le tatou fale lea poo lisi le STEC? Po o lea le faiga o loo fai ai aua o lea pei o le tatou fale o lea auina atu ai tatou faaeleleaga a le atunuu e faatau ai e pei o se faamaketi foi lele iina i totonu o Aukilani. O le vaega e fia malamalama ai lau Afioga ile Taitaifono o le tatou Komiti. Ua tele tausaga pei ona matauina o le tau pei se faamanuiaga foi lea e ave i le tagata faigaluega ua maliu e \$4000. O lea ou te manatua ua fai si tele o tausaga o \$4000, o le fautuaga tau ona sii i luga le tatou tupe lea, faamanuiaga lea. Aua a matau foi i le tulaga o tupe faasili a le Faalapotopotoga o loo siisii pea lava i tausaga uma, tausaga uma o nei tagata faigaluega e leai lava nisi vaega seleni e agavaa iai mai le latou 1% e toese mai latou totogi e ave i le Faalapotopotoga. Afai lava la e uma a lou soifua galue e te le o aafia i se faalavelave, ia e leai lava sau mea e maua ae alu lou tausaga, tausaga lou soifuaga atoa lea e te galue ai toese le 1% o lou totogi, ae oo mai le taimi e te malolo ai ma e maliu ia na o le \$4000. E ese mai la aua o lea sao tatou talanoa i le NPF ananafi e \$5000 faamanuiaga a le NPF i le aufaisaofaga o loo totogi latou saofaga i le NPF ae feololo le NPF aua e mafai ona e alu ma nono mai au tupe ma lau saofaga. A o le tatou ACC e leai ni nonogatupe e fai ai nao le pau a lea o le tipi tupe, tipi totogi, tipi totogi ae a e maliu o la e te faigaluega ma e agavaa i le faamanuiaga lea e \$4000. Se i silasila ane tau ina faapena atu faataatia atu le fautuaga sei silasila ane pe ua tataua ona sii i luga lona vaega, lea foi ua aumai manino le lipoti a lau Afioga i le Komiti. O lea te faitau atu iai pea maliu le tama o le aiga? Maua faamanuiaga a le tina, tina ma le fanau ese le faamanuiaga tau tupe e maua e le tina e le o faigaluega. A o lo o i ai le fanau ese foi le faamanuiaga tau tupe e maua e le tina e leo faigaluega e iai le Fanau , ao le fesili faafefea aiga foi ia ae maliu le tina aua o lea leo aumaia i lau lipoti e agavaa pe maua e le tama se faamanuiaga pe afai e leo faigaluega le tama ? tataua foi ona maua lona faamanuiaga e le Tama, faapena ia tulaga e i ai, ae masalo e mafua la'u fesili se i maua se avanoa e toe faamanino atili ai le lipoti a lau Afioga ma la outou Komiti i lona tulaga, aua a maua e le tina e tataua foi ona maua e le tama. Lau

Afioga i le Taitaifono, manaia foi ia fuafuaaga lea ou te vaai atu ai poo lea ua faatino e le tatou Matagaluega o le agavaa e mafai ona totogi levy mo tamaiti aoga, aua e fia maua se faamaninoga mai lau afioga, pe faapefea le faatinoina o lea foi tulaga. Aua afai o lea e agavaa ma tamaiti aoga, pe totogi ni levy a tamaitai aoga, o a ni mea e manaomia e agavaa ai tamaitai aoga i faamanuiaga a le ACC? O tulaga na e fia avatu ai se fesili, ae faamauina le faafetai. E faafetai i le tatou Faalapotopotoga ACC mo fesoasoani ia, o lea ua saunoa manino le afioga i le Palemia, i Matagaluega ia sa fesoasoani i ai le ACC, aemaise le Matagaluega lea o le Soifua Maloloina, ona e taua tele le CT Scan lea na faatupe mai e le ACC, e momoli atu ai le faafetai. Faafetai i le Pulega ma le Komiti faatonu, i le tulaga lea... aua e tasi lea masina taua ma aoga ua leva ona manaomia. A o lea la ua faatupe i lea foi vaitau ma maua ai le tatou masini. Afai foi e i ai nisi masini, aua e fai si taugata o masini faapenei, afai foi o i ai nisi masini o lo o fia manaomia e le Matagaluega o le Soifua Maloloina, ave i ai se fesoasoani. E toe aumai nisi..po o a nisi masini e le o maua iinei, ia faapena ona ave i ai le fesoasoani, aua e aoga mo le soifua maloloina o le atunuu.

Lau Afioga i le Fofoga Fetalai, e faapena se manatu, e tuuina atu ni nai fautuaga, ae ia manuia lenei aso ma le tatou Fonotaga.

**FOFOGA FETALAI:** Ia malo faafetai saunoa i lau Afioga i le Taitai o le Itu Agai, e tusa foi o nisi o tuualalo ma fautuaga taua aua lava tiute fai o le tatou Faalapotopotoga.

O le avanoa lenei i se tasi o sui usufono. Tulai mai le sui Tamaitai o Alataua Sisifo.

**Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai - Alataua Sisifo):** E faatalofa atu i lenei taeao i lau afioga i le Fofoga Fetalai, faapea foi le Afioga i le Palemia, o Minisita o le Kapeneta, o Minisita Lagolago, faapea foi lenei Itu o le Maota, susuga i sui usufono faapea le Taitai o lenei Itu, aemaise o Samoa ua potopoto mai i lenei taeao.

E muamua ona momoli atu le faafetai i lau afioga i le Taitaifono mo le lipoti auiliili a le Faalapotopotoga o Tau ma Faalavelave Faafuasei faapea foi ia tali a le Malo e pei ona folasia. Ae o nai fautuaga, ona faatoa maua foi lea o avanoa e malamalama ai, e pei ona faataua ai saunoaga a le Taitai i lenei taeao, i avanoa faapenei e le aumaua, aemaise o avanoa e malamalama ai i galuega foi a isi Komiti, aemaise o tulaga i Faalapotopotoga eseese a le Malo.

O le tulaga ia i tatou faamanuiaga ia e maua, e pei ona saunoa le Taitai o le Itu Agai. Aemaise le tulaga lea, a oo loa ina toe to manatu i le fia tausaga o faigaluega, a oo ina litaea, po o le onosefulu tausaga talu ona faigaluega ma tipi le totogi i le ACC, pe lima ono tausaga talu ona litaea ae maliu, ia e leai

se faamanuiaga. E pei o i ina e toe, pe i ai se lagona pe le tatau ona toe iloilo faiga faavae a le tatou Faalapotopotoga lea, aua ou te talitonu e le i toe i ai se iloilo ina o faiga faavae a le tatou Faalapotopotoga lea, ona o le mea lenei na i ai i le amataga lava, ua talafeagai i lenei vaitau ona toe iloilo faiga faavae a le Faalapotopotoga o Tau'i o Faalavelave Faafuasei, aemaise foi o faamanuiaga ia e maua, ona e pei e le fetui le fia o tausaga o faigaluega, ae pe tasi atu le tausaga talu ona litaea, ae tupu ai se faalavelave ae uma ae ua leai se faamanuiaga e maua. Ae afai o la lava e faigaluega, e maua le faamanuiaga. O se tasi lena o itu e toe faapoo atu ai.

Ma lona lua o tulaga ia a maliu le tama e maua le \$20,000 pe a faapea e le faigaluega le tina, ae \$16,000 pe a faapea e faigaluega le tina. I so matou vaivaiga lo matou itupa, o tina ma tamaitai, e faalelogo malie ia faaiuga. Aua foi, o tupe lava ia tasi lea na tipi mai i le tama, afai e uma le soifua galue o la na oo i se 60,000 sana tupe na tipi, le tama lava lea e tasi. Ae o lea na ave le 20,000 i le isi tina, ia le isi foi tama lea e onosefulu afe na tipi, ae oo mai ua oo i le isi tina lea e 16,000, ona o la e faigaluega. Ou te talitonu e le o le auga lea... afai o le tau'i lea e maua e le tina, pe a maliu le tama e 20,000, e tatau ona laugatasia. E le faapea o la e faigaluega ona tei ai lea ua faapau i lalo le tau'i e tatau ona maua e le tina.

O se matou tuualalo, e pei o le auga lena e tatau ai ona toe iloilo faiga faavae. O nisi o tulaga lea sa saunoa i ai le Taitai o le Itu Agai, o tulaga ia i faiga faavae, aua e matau atu, o le tele lava o tatou developments i atunuu i fafo, ma Samoa nei foi, o lea e faatupe lava e le tatou Faapotopotoga pe a faapea ua le tali mai le NPF ma faletupe. Po o le a tonu lava le auga? Le a tonu lava le auga i i na faavae ai le tatou Faalapotopotoga lea. Po o le mea na faavae e fesoasoani i le Malo e faatupe ai a tatou galuega tetele po o le mea na faavae e fesoasoani aua le tau'ia o nai o tatou tagatanuu pe a aafia i ni faalavelave faafuasei.

O le isi itu e talosagaina ai, o lea e matau atu, e lilifa lava na o faalavelave i taavale afi. Ae talitonu o lena e i ai le tofa ma le faautautaga i le Pule Faatonu, toe tagai ai i tatou faiga faavae, ina ia aofia ma nisi o faalavelave, e ono tutupu mai, aua e pei o i ina lea e lilifa i ai o tatou tau'i mo faalavelave faafuasei.

O se manatu lena o lenei usugafono i lenei taeao, e fesoasoani atu ai i le tatou lipoti, ae momoli le faafetai tele i le Matagaluega mo tapenaga aemaise foi o le tulaga tau tupe, e matauina o lo o solosolo lelei ia tupe a le tatou Faalapotopotoga. Manuia le Fono.

**FOFOGA FETALAI:** Malo faafetai malo saunoa i le sui usufono mo le faaso ma le tuualalo aua le agai i luma o le tatou Faalapotopotoga. Tulai mai le sui usufono mo Satupaitea.

**Afioga Hon LAUTAFI FIO SELAFI PURCELL (Satupaitea):** E faafetai atu i lau afioga i le Fofoga Fetalai, o lea faatoa maua se avanoa o lenei sui usufono e lauga ai i totonu o le Maota i lenei vaiaso. Ma e le sii soo le vaa o Satupaitea. A o lenei taeao e momoli le faafetai i le avanoa ua tuuina mai. A o le i faia se tala a le sui usufono, e faatalofa atu i lau afioga. E faatalofa atu i le Tamaitai Palemia, le Kapeneta faapea foi le mamalu i Minisita Lagolago. Liliu mai foi i lenei Itu, i le afio o le afioga i le Taitai po o le Itu lenei o lo o agai le Malo, faapea sui usufono uma o le Maota. E faatalofa atu i Ofisa Sili o Pulega o Matagaluega o lo o usu mai pea i taeao uma o a tatou Fonotaga, malo le onosai, malo le tauatai, e le faigofie foi la outou galuega fai. Ae faamalo lo outou pale mai e tuu mai foi ni fautuaga i mataupu o lo o talanoaina i totonu o le Maota lenei. E faatalofa atu foi i le mamalu o le Ofisa o le Fono.

E faatalofa atu i si ou itumalo o lea faatoa maua se avanoa. E faafetai i lo outou taputapu mai, ma lo outou tatalo e manuia ai faiva o la outou sui usufono.

Ae ua ou tulai atu lau Afioga ona o le lipoti a le Komiti, mo le talanoaina o le lipoti faaletausaga a le Matagaluega o Tau i Faalavelave Faafuasei. E leai ni au tala tele e uiga i mea o lo o laga i totonu o le lipoti ona o au lea sa ou i ai i totonu i le tausaga lea. O le mea foi lea e lelei ai lava le lipoti lenei. E pau le mea ou te fia talanoa i ai, ou te fia faaali ia mea ia o galuega sa mafai ona ausia e le Matagaluega i le tausaga lea, highlights.

O le mea lava e silisili ona taua ia te au, o lea foi e sau i i le lipoti a le Komiti, overall finding a le Komiti. Throughout the Committee's consideration, it noted the well organization and management of the Corporation's operations for the Financial Year. E ese le matagofie o le faaupuga lea. O le Matagaluega o lo o lelei le pulega o mea uma, o lo o latou vaaia.

**FOFOGA FETALAI:** Ua ou vaelupeina le saunoaga a le sui usufono mamalu, talu ai ona o lea ua tatou taunuu mai i le tatou taimi o le malologa o le taeao. O le a faaauau le saunoaga pe a tatou taliu mai le malologa.

E talu ai, mo le silafia e le paia o le Palemene, o se taimi o le aoauli nei, ua faamoemoe e tuuvaa ese atu ai le Afioga i le Tamaitai Palemia, mo fonotaga faava-o-Malo. O le maea ai o le tatou malologa i le taeao nei, e tuumuli ese atu ai i tatou Tauaalamaga mo le tapenaina o lona afio atu mo le faamoemoe o le tatou Malo mo atunuu mamao. E i ai le manatu, o le a fai ia le leo o le Fofoga Fetalai, e fai ma tofa momoli o le tatou Maota, a o se tatou upu puupuu taumavae e faamanuia atu i le faigamalamaga a lana afioga i le Taitai o le Malo.

Lau Afioga i le Tamaitai Palemia, o lea ua fofoga aloaia lo tatou Maota nei, aemaise o le faafofoga tapuai mai a Samoa, mo le faamoemoe o lau Afioga mo Fonotaga i atunuu mamao, i se taimi o le aoauli nei. E i ai lava le

talitonuga ua i ai faamanuiaga a le Atua i lou valaauina. Ua faaauppegaina foi mai le lagi lou finagalo, aua o lea ua see malu le sa o le pulega faatonu e ala i lau faatonu folau. O lea o le a motu ma le taula lou sauni folau atu mo atunuu mamao, e ui i lea e le o tuulafoaina e le tatou Maota ma le atunuu, e ala i talosaga molia i le Atua i le ao ma le po, lou tu mai ai i matagiolo. A o lenei aso ma le faamoemoe, ia tatou lalafo i le Atua ia fuafuaga uma, ua na o Ia o lo o i ai manuia ma le poto. Ia faatofa mai le lagi lou finagalo, aua e le faigofie upufai i le va o Malo, a o feagai ai le lalolagi ma le tele o faafitauli i lenei vaitau. Ia i ai pea le faauuga mana a le Atua i lau afioga, ina ia tutupu pea matagi i liu o le sa folau o lau tofa faalele.

Ia faapena foi ona i ai lau faamalologa ia maua pea lou malosi faafouina, ia sili i la le agaga, e tafatafa fuga i ai lou finagalo. O le tatalo, tau ina tolaupapi lona agaga i ala uma o le a uia, momoli filemu atu lou soifua i faamoemoe ma fuafuaga mo se ai o le tapuaiga a Samoa a o se viiga o le Atua. O le a matou tatalo ma tui atu le mulipapaga i lou alofaiva, alofagia e le Atua, ia tatou taumavae i lona alofa, ia tatou toe feiloai foi i le fiafia, i Lona aao faaloaloa. Ia manuia tele lau faigamalaga.

**Afioga Hon FIAME NAOMI MATAAFA:** Lau Afioga i le Fofoga Fetalai ona ua tatou oo mai i le taimi o le tatou malologa. O lea foi ua saunoa faamalamalama lau Afioga i le Fofoga Fetalai e tusa ai ma lo'u toesea, faafetai tele mo le tapuaiga ua folasia. E tuu atu pea i luma o le Alii le faamoemoe ina ia sao ma uli le faigamalaga, ona o lea ua taua i faamaumauga a le tatou Fono le tuua o le atunuu. Ia tau ia na matou faaali atu ma le faaloalo o le faigamala lenei e malaga i Peretania i Lonatona i mataupu tau Malo o le Taupulega. O Samoa e i ai i le Komiti e ta'u o le Commonwealth Ministers Action Group. Ma o le a see atu e fai ma Taitaifono ma o se Komiti laititi o Minisita o Va i fafo e gafa ma mataupu e tulai mai i lea taimi ma lea taimi e luitauina ai faiga faavae a Malo o le Taupulega aemaise lava Pulega Faatemokarasi. O le galuega lea a le Komiti lea e sosoo ai ma le Fonotaga a Minisita o le Va i Fafo a Malo o le Taupulega o le faailogaina o le aso faapitoa, o le Commonwealth, ma maua ai le avanoa e faatalatalanoa ai ma le Ofisa Tutotonu o Malo o le Taupulega i le tatou tapenaga mo le Usugafono Taitai po o le Taupulega i le tausaga 2024 le masina o Oketopa. I le toe talii mai e afea Ausetalia i le valaaulia aloaia a le Malo o Ausetalia. E 5 aso o lea asiasiga faavaomalo, maua ai foi avanoa e faatalatalanoa ai mataupu o le tatou faiga paaga ma le Malo o Ausetalia ma o le faamoemoe lena. Faafetai i lau Afioga i le Fofoga Fetalai mo faamanuiaga matou te faapea atu foi manuia le faaauuina o le tatou galuega ma le faamuli o loo afifio atu le aiga Kapeneta, le Afioga i le Sui Palemia, lagolagosua i le galuega faaauau e pei ona iai le tatou mataupu o loo faagasolo. Ia manuteleina fuafuaga o le fonotaga, toe talii mai maua isi

avanoa tatou te toe mafuta ai e tauave le tatou galuega e pei o le tatou valaauina, faafetai tele.

**FOFOGA FETALAI:** Malo faafetai, malo malele i lau Afioga i le Tamaitai Palemia, lea foi ua faafofoga maua le paia i le Maota aemaise foi le faafogafoga mai a le atunuu i le autu ma le faamoemoe o le toesea mai tatou atunuu. O le mea lea, lea ua faamanuia atu lo tatou Palemene, faamanuia atu foi lea o le tatou atunuu, ia manuia le faigamalaga.

*Na faataatiaese Taulumaga a le Fono Aoaofaitulafono i le itula e 10:49 i le taeao ma toe faaauau i le itula e 11:33 i le taeao .*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoaofaitulafono.  
Ou te tapa lau Afioga i le Sui Palemia mo le lafo.

### **LAFO MO LE SUIA O ITULA FONO**

**Afioga Hon TUALA TEVAGA IOSEFO PONIFASIO (Sui Palemia):**  
Lau Afioga i le Fofoga Fetalai, e i ai le manatu ua saoi le tautega ma le taligasua a le tatou Palemene e ala i le taumafataga i leni taeao. E talitonu foi ua maua se faasiligamalosia mo le faaauauina o le tatou galuega. E momoli atu ai le faafetai tele i lau Afioga ma lo tatou Ofisa nei mo tapenaga aua le alofaiva o le tatou Maota.

Lau Afioga tatou te molimau i le lelei faagasolo o le tatou galuega. Peitai, e i ai lava le naunautaiga e tatau ona tagofia uma a tatou Lipoti ma Tali a le Malo i le tatou Fonotaga i leni masina e pei ona faatulaga mai i le tatou Pepa o Galuega ua i ai.

Ou te tulai ai ma le faaaloalo lau Afioga e faatu le lafo, *Ina ia faataatiaese le Tulafono Tumau 32(1) mo le suia o tatou Itula Fono mo le Aso Fono leni e faapea: O le a faaauau pea a tatou Taulumaga seia aulia le itula e 1:00 i le aoauli nei ona faataatiaese lea mo se malologa ma toe faaauau ai i le itula e 2:00 i le aoauli se i tolopo i le itula e 6:00 i le afiafi a nanei.*

O le lafo lea ma le faaaloalo lava lau Afioga.

*Faaluaina e le Minisita mo Galuega, Felauaiga ma Atinae Eseese ma le Minisita mo le Soifua Maloloina.*

*Na faamaonia le lafo.*

**FOFOGA FETALAI:** Ia, o le a faagasolo le tatou galuega e tusa o le lafo ua faamaonia e le Palemene.

E faataatiaese a tatou Tualumaga mo le malologa o le taeao o lo o saunoa le Afioga i le sui usufono mo Satupaitea e tusa o le Lipoti a le Komiti ma Tali a le Malo. O lea ou te tapa ai lau Afioga mo le faaauuina o lau saunoaga lau Afioga i le sui usufono mamalu.

**Afioga Hon LAUTAFI FIO SELAFI PURCELL:** Faafetai lau Afioga i le Fofoga Fetalai. Ia, e faalua le faafetai i lau Afioga ma le Ofisa o le Fono ona o le faamalositino sa alo atu i ai le Palemene. Faafetai le faaaloalo.

Ae ou te toe tulai atu e faaauau se faamatalaga e uiga i le Lipoti Faaletausaga, i le Lipoti a le Komiti lea ua i lumamea nei. E pei ona fai atu, e le na o le pau le tulaga ou te fia tautala i ai, o tulaga sa ausia e le Matagaluega lenei i le tausaga lea, ma le latou tautua sa taumafai ona fai i le tausaga lea e talanoaina. O lea ou te tilotilo atu o le mea taua lava i le Lipoti lenei, pe a silasila lava i le auga o le Matagaluega ma le latou galuega fai, their core function, lea e tulai mai ai o le tausaga lea o lo o talanoaina nei, o le tausaga lea e sili atu ona maualalo ai faalavelave tutupu faafuasei mai le 5 tausaga i luma, last 5 years o le tausaga lea. Lowest number of reported accidents injuries and... the last five financial years. O lona uiga, e momoli lava le faamalo ua i ai le suiga lea ua tupu, lea la e maua mai galuega ia e taumafai i ai e galulue faatasi ma isi Matagaluega ia faaitiitia le tutupu o faalavelave faafuasei e aafia ai le soifua o tagata faigaluega, ia ma i latou e le o faigaluega. O se fuainumera matua lelei tele, ma e talosia o lo o faaauau pea e oo mai le taimi nei mai le taimi lea.

O le isi taumafaiga lea e vaai atu i ai, o lea ua mafai ona fai totogi o faalavelave faafuasei mo i latou o lo o taaalo i taaloga, sa le masani, a o lea ua oo atu i ai le kava, ua oo i ai le kava, le compensation coverage mo tagata taaalo. O se mea fou lena, o le tele lena o le faateleina o le faamanuiaga mo i latou e taaloga. Ia, atonu e tali mai le Taitaifono o lea sa laga e nisi le auala e fai e maua ai le levy a tagata taaalo, lea e tuu mai i i, e tataua ona resitala le kalapu, resitala foi autaaalo a aoga ona maua lea pe a lavevea tamaiti. Aua tasi lava lenei auaunaga sa le i ai, ma sa toatele lava nai fanau a le atunuu na faamuta ai lava i i le latou taleni i le lavea lea, ae le mafai ona fai se faiga e rehabilitate pe toe faaleleia ai se mea ua leaga. Lea la ua maua i lalo o faamanuiaga nei. O se faamanuiaga lelei tele lea ua oo i ai le galuega a le tatou Matagaluega. O lea foi e vaai atu o lea e i ai le sootaga ma le Matagaluega a le ACC a Niu Sila lea ua faipaaga ma le tatou Matagaluega lenei lau Afioga. O se faiga lelei tele. E le faapea na o latou o la e o i o ae o la e foi omai latou i inei e aoao foi i le faiga o tatou foi galuega, ma o tatou tagata faigaluega i o e galulue ai ma tilotilo ma mataitu foi auala e mafai ona omai faaleleia atili ai le auaunaga. O se faiga lelei, ma ou te lagona e tataua i isi foi Matagaluega ona uunaia, ia tilotilo i auala faapea e faalautele ai le

tomai, faalautele ai le atamai, o le lelei foi lena o le faatinoga o le auaunaga. Faamalo atu lava i ia tulaga lelei tele ua tulai mai.

Ia, o le tausaga lea lea foi sa tatou talimalo ai i le taaloga a le Pasefika, e sau la mea ia o taaloga a le Pasefika, o lea ua kava tatou tagata taaalo i lalo o le sifi fou lea o tagata taaalo. Ia, e tele lava le sao o le Matagaluega i lau tilotilo atu i ai i le taumafaiga foi o le faamanuiaga o le tatou talimalo i taaloga ia, ma sa auai foi. Ia o lea foi sa avatu taavale faapitoa a le tatou Matagaluega e feaveai ai i latou foi ia e le atoatoa le malosi faaletino lea sa omai e taaalo. E faalauiloa atu ai foi le tele o le tautua a le tatou Matagaluega lenei.

O le tatalo lava, e moni o lea ua tuu atu i tua, ua faalautele laitiiti atu, a o le tatalo lau Afioga i le Taitaifono ma se i tilotilo ane i ai, ia tele atu le coverage, faalautele i tua. Silasila le Matagaluega i nisi auala e fesoasoani ai i le atunuu, e fesoasoani ai, tagata lea e i le taimi lenei e le o lavea i lalo i i, e le o lavea i le coverage lea, aemaise lava nai tagata foi nei e le malamalama lelei i tatou nuu i tua ma tilotilo i auala. Afai e sui le Tulafono ia mafai ai ona tatou fesoasoani malosi ia maua foi se tau i nai na tagata, ia o le a le mea e tuu ai? O lea e tasi le tausaga lea, e \$17 miliona le tupe mama. Ioe. E tatou te sefeseфе lava le tupe lenei a le Matagaluega i tutupu mai ni faalavelave, i tutupu mai ni faalavelave, a o la e i ai le tupe e tua i ai le tatou Malo. Ua tatou faalogologo i se tulaga foi i Niu Sila, ia, i tulaga la e ua pagatia ai le pitonuu o Niu Sila. E le i fuafuaina e Niu Sila e oo i se tulaga faapea, a o lea na oo i ai, o tagata maliliu. Atonu o ni tulaga faapena lea e posiposi ai faapea le tupe a le Matagaluega. Ae ou te lagona e lava a le faasoa, e lava a le faasoa, tuu atu i tua i nai tagata la e le o maua le faamanuiaga i lenei taimi, ia taumafai ia toatele atu ni tagata e faamanuiaina i lalo o le tatou Matagaluega lenei.

O isi mea ia e tilotilo atu i ai, e tele lava fesoasoani a le Matagaluega i isi foi Matagaluega ia a le Malo, talu ai le naunau ina ia tau faamausali le mea lea o le consensus foi lea i mea e ono tutupu ai faalavelave faafuasei, o mea laiti lava ae pei e faatalale foi lea i ai le tatou atunuu. Ae tupu loa la se faalavelave, ia, ona faatoa loa lea, ia sa tatau ona fai lou pulou i le taimi lea sa ou alu ai i fea, tatau ona fai le a. O mea faapena. E always thinking i le workplace i auala e puipuia ai lou soifua mai se faalavelave faafuasei e tupu. Lea e aafia ai uma lava isi Matagaluega ia. O le aoga lena o le strategy lea ia laugatasia uma Matagaluega a le tatou Malo i le tulaga lea. Ia aua ne i faapea na pau lava lea o le Matagaluega o le latou lava galuega lena. E leai.

E faamalo atu ai i le Matagaluega i le Tamaitai Pule ma le Matagaluega, aemaise foi le Komiti Faatonu i la outou... le Afioga i le Taitaifono ma lau Komiti. Faamalo le galulue. E leai lava se isi, seiavagana fesili lena sa tuu atu e sui usufono, a o au ia, tuu atu i le Taitaifono e talia fesili na. Ae na o lau faamalo lava ma lau faafetai i le tulaga ua oo i ai le auaunaga i le tausaga lea. O le tatalo, talosia o faaauau pea, faaauau ai pea le alualu pea i luma.

Alu pea i lalo tagata lavevea i faalavelave faafuasei, ae maua lava tatou tupe maua pei o le tulaga lea e aliali mai i i.

Lau Afioga i le Fofoga Fetalai, na pau lea o mea sa ou fia tulai atu ai. O nisi o fautuaga lea e tilotilo atu i ai, ou te auai ai foi i fautuaga ia, lea e tuu mai i le kava aua latou e galulue galulue e uma lava e leai se faalavelave faafuasei o lavea ai. Ia, atonu lava o lea ua taatia mai se i silasila i ai le Loia Sili pe mafai ona sui le Tulafono e mafai ai ona fai se tulaga faapena.

Ia, o tulaga lava na o mea nei o Tulafono a Matagaluega, ae i ai lava le taimi e fesui mai lea taimi i lea taimi. Afai foi ua tatau ona sui le Tulafono a le ACC, ia o tatou e suia aua penefiti mo tagata o le atunuu e agavaa i ai.

Lau Afioga i le Fofoga Fetalai, faafetai tele mo lou avanoa. Ia manuia le tatou Fonotaga.

**FOFOGA FETALAI:** Malo faafetai. Ia, o lea ua matau atu o lea ua fou mai le sa o Safata 1. Ia tulai mai le sui usufono mamalu.

**Afioga LEANA RONNIE POSINI (Safata 1):** Faafetai tele i lau Afioga i le Fofoga Fetalai, faafetai foi ua maua se avanoa o lenei itumalo e faaali ai foi so matou manatu, e ala foi i le Lipoti a le Komiti.

E muamua foi ona faatalofa i lenei Palemene i lau Afioga i le Fofoga Fetalai. O lea foi ua maua o lea ua tuuvaa atu le Afioga i le Taitai o le Malo le Afioga i le Tamaitai Palemia, o lea ua e saunoa. Ia talosia i le alofa o le Atua e faataunuu le fuafuaga i fonotaga.

E faatalofa atu i lau Afioga i le Sui Palemia ma le mamalu o le Kapeneta, Minisita Lagolago foi aemaise lenei itu i le Taitai ma lenei Vaega o lo o Agaia le tatou Malo.

E faatalofa foi i Ofisa Sili o Pulega ma Pulega, o outou o poututoa e tautuaina le tatou Malo. E talitonu o le a... e faatalofa foi i le Afioga i le sui usufono mamalu o Vaimauga 3, malo le faatoatoa, manuia lou tulai mai aua le itumalo.

Ae avatu ia so matou manatu puupuu i le Lipoti. E muamua ona faafetai i le Ofisa Sili o Pulega ma le Pulega ma le Komiti Faafae o lo o faafaeoeina le tatou Matagaluega lea o Tau'i o Faalavelave Faafuasei. Na o nai fautuaga e avatu e taatia atu i le Taitaifono aemaise foi le Minisita, i la matou matau ou te faafetai tele i le fuafuaga a le Malo na faatu ai lea Faalapotopotoga. Lea foi ua matau ua tupu ma ola, ou te talitonu foi ua tatau ona oo i le taimi e toe tilotilo atili ai lo tatou Malo, tulaga o tulafono na faafae ai le Matagaluega lea aemaise foi faiga faavae. I lau lea fuaitau, ona o lea foi ua matau ua tele tausaga a o lea foi matau o loo faatupulaia ia tulaga lelei o le tatou Faalapotopotoga. E i ai lou talitonuga se i silasila totoa le tatou Komiti Faafae ma le Pulega tilotilo ifo i le tulaga lea o faiga faavae ma le toe suiina o tatou vaega foi lea o faamanuiaga mo nai o tatou tagata o sau tala i tagata ia o tatou ua oo tausaga ia litaea ai o lea ua malolo mai ai galuega 55 tausaga

ia poo 60 foi o tausaga. Ae afai e o le taimi e malolo ai ma faamuta ai foi faamanuiaga ia e maua mai le tatou Faalapotopotoga, e iai a lou manatu i le tele o tausaga na galue ai ae o lea la faamuta ai ii. A tatou silasila foi le tagata lea faatoa faigaluega tasi le tausaga ae tupu ai se faalavelave poo le a le tulaga faapena, o la ua ona mauaina ia faamanuiaga ia. A o lea na tautua i le 30 i le 40 tausaga ae uma ina ua malolo ifo ina ua litaea ae leai se faamanuiaga e maua e ia. A o lau faitau se i silasila totoa atu ai lo tatou Komiti i tulaga e faapea aua e iai lou talitonuga a tuu atu foi lea ua malolo i le 55 ae a oo a le faamanuiaga lea faaauau i le 65 tausaga poo le 70 tausaga. Ae a iai se mea e tupu ai ae fai pea nai faamanuiaga nai o tatou tagata faigaluega ia. Ia se i silasila totoa ifo iai i tulaga ia pea sui le tulafono ma faiga faavae. O le tupe foi lea o le 4 afe lea tau e iai foi lo ta ita lea lagona tatau foi ona tuu i luga le tatou tupe lea, aua o lea ua tupu ma ola ile tatou Faalapotopotoga ae pe a pe a tau tuutuu atu i luga nai loo le 4,000 lea ua fai foi si umi o iai o le isi mea o le tala tala i tua aua o lea pei e matau o le tulaga lea na o e aafia mo taavale afi, ona o le penisini ma tulaga faapea e maua ia faamanuiaga ia o taui o faalavelave faafuasei aea pea silasila ifo le tatou Komiti. Ae faafefea le faifaatoaga? Ae avatu a le paia o le Palemene e iai foi le tagata e galulue e faaoga ile taina o le vaomatua e fai ai faatoaga o ili afi, la iai foi penisini i mea na aea foi le tagata fai faiva e maliu mai le sami o nai tagata ia e tatau ona talatala i ai ia tatou Komiti lea, talatala i tua aua o lae galueina le aufaifaatoaga aua le atinae manuia ole tatou atunuu e le gata i lea o le au fai faiva. A o galuega foi tatou silasila foi iai lo tatou Malo, galue foi ia e malosi pei o le Kamuta tulaga faapena galuega foi lele e faaoga tele iai le malosi o le tino, tele le aafiaga o faalavelave faafuasei talitonu ua tatau ona oo iai le tatou Pulega talatala atu ai i tua ia maua ia nai taui o tatou tagata, tagata o loo fetai i le la ma le timu i taimi uma i le taumafaiga o le atinae o le tatou atunuu, nai manatu ia o lenei itumalo manuia tele tatou fonofaafetai.

**FOFOGA FETALAI:** Malo saunoa lau Afioga i le sui mamalu mai Safata 1 faafetai foi mo le sao ma le tuualalo aua foi le agai luma o le tatou Faalapotopotoga. Ia tulai mai le sui mamalu mai Aleipata Itupa i Luga.

**Afioga FUAAVA SULUIMALO AMATAGA (Aleipata Itupa i Luga):** Ia ua faafetai atu i lau Afioga i le Fofoga Fetalai mo le avanoa. E manatu o lea ua matu foi i fau le palega auau aemaise foi le taliga o le sua i lau Afioga ma le mamalu o le Maota. E momoli atu ai le agaga faafetai i le Afioga aemaise foi le Failautusi ma le aufaigaluega i le tapenaina o le taumafataga, maua ai foi si na faasiliga malosi e taumafai atu ai sina faamatalaga laititi e uiga i Lipoti a le Komiti ua i lumamea nei. Lau Afioga o lenei foi taeao e faafeiloai aloaia atu i lau Afioga i le Fofoga Fetalai aemaise foi le paia o le Maota, le afio o le sui Palemia ma Alii ma Tamaitai Minisita o lea ua afio

atu le tamaitai Palemia, agalelei le Atua i faigamalaga ma valaauina ua faapena ona lautogia iai aemaise foi o Minisita lagolago, le Taitai o lenei itu ma sui usufono. E faafeiloai atu foi i le paia o Ofisa Sili o Pulega o Falapotopotoga ma Matagaluega a le tatou Malo faaofofogaaga o Samoa i ona tulaga faalupe i paia faalemalo, paia faalekalesia aemaise paia foi faaleatunuu o le a le oo i ai. Ae o le a taumafai atu se faamatalaga faafogafoga foi si ou itumalo i se leo foi e avatu ai sa matou motugaafa e tusa ai male Lipoti a le Komiti. Lau afioga e momoli atu le agaga faafetai i le Komiti e tusa ai ma le Lipoti ma o lea foi ua aumai latou fautuaga ma ua iai foi ia Tali a le Malo ua tuuina mai. E faaleoina le lagolago foi a leni Itumalo e tusa ma fautuaga ua tuuina mai e le Komiti, ae ua na o ni nai manatu faafautuaga foi e toe faaopopo atu ai i le tulaga lea pei ona aumai i le Lipoti a le Komiti.

I le tulaga lea oo mai le fautuaga faapea foi lea pe iai se vaega lea ua taua le 10% e toe entitle iai ia i latou fai saofaga poo i latou ia sa galulue lea ua tipi le latou saofaga ae ua oo le liataea ma e iai le tulaga foi lea foi e saunoa nisi o sui o loo iai foi le agaga o le Faalapotopotoga ina ia putiputi ma sefeseфе ia seleni nei tei ua tutupu mai foi ni faalavelave matuia, faalavelave faafuasei a o loo iai pea ia seleni mo le ola, e faasoaso i tulaga ia lau Afioga. E pei o se tulaga foi lele o lea e manaia le fautuaga lea ae na o nai teuteuga foi lele aua o lea ua aumai le Tali a le Malo sei silasila iai le Loia Sili aemaise foi o le Komiti ile lauliliuina lea o faiga faavae aemaise foi o le Tulafono a tulaga foi lele pei o se teuteuga. I le tulaga foi lea faapea e 10% o se faaitaiga ae afai o oe ua e litaea ae lei faia se claim aua e iai le isi tagata ua litaea ae toetiiti claim le tele o isi tausaga, ona teuteu loa lea i se faiga faavae a faapea e 10% lona uiga e entitle atoa le 10% o le sui lea e lei faia se claim talu mai le olaga faigaluega e 10, 20, 30 tausaga o galue. O lona uiga e tau mai foi iina o se tagata foi lea sa tausia le OHS poo le Occupational Health and Safety, le isi foi tulafono o loo galulue ai ia tatou MCIL aemaise foi ole ACC ina ia faaitiitia ai le faatupulaia o ni faalavelave ma tulaga foi ia e aafia ai le augalulue ma ona fai ai claims ma tulaga uma faapea. Ae a faapea la o ta ita lea sa galue ae na iai ni taimi sa fai ai ni claims ona aveese mai lea faapea e 10 afe la ta 10% a o la ta claim worth e 2,000 toese mai lea ae maua si au 8 ae toese le 2. Pei o na o lena o se vaega foi lele faatupu manatu ile tulaga lea pea faapea e lauliliu e le faiga malo ma talia ia fautuaga a le Komiti o le isi tulaga o le tulaga lea foi lele i le entitle e tagata galulue e iai le tulaga foi lea 10 tausaga o ou galue ile Samoa Water Authority. O le tele a na aafia ia aemaise a meter readers o nai alo ma fanau ia e o foi lele e tufa pili ma fai le mita ao le manua a e tele ona lavevea ai o taifau, aemaise a aiga foi aua o le mea sa iai ile taimi lena e tele ona ou alu ese mai ile Faalapotopotoga lea le Pulega o Suavai. E fiu tau fai claim aua a avatu a le Falemai fai mai pepa mai e le fomai pe 2 vaiaso ona e tuga manua foi lele i aao, aua e eseese ia nisi o aiga e iai isi aiga e pei leo e taifau ia maota a o la e tu ai le mita i totonu

a o atu la nai meter readers e tau faitau ona aafia lea ao le mea ou te matauina o le faigata ia o le claim ina. A toe faiatu i nai tama galulue foi ma latou foi e toe o ile falemai e sui fusiga ma mea faapena e uma ane pei ua tele atu le pili i le fealuaiga a le tagata lea aafia ao lea taumafai e fai le claim na o se mea foi e nai events ia lea tutupu e faatupu manatu foi i le agai i luma ona o nai tagata o lea galulue o lae tipi latou ACC ao le process ina lea o latou entitlements ia. Ou te iloa o sesi tulaga e tau lauliliu foi lea tau faaitiitia ai le process foi lele tele mea aua la foi e manaomia e le tulafono a le Faalapotopotoga, mea e faamaonia ai ma tulaga foi lele i sailiiliga ma lipoti ina ia make sure o le entitle lea o la e talafeagai ae ou te iloa foi a e silasila pea iai le pulega i le tulaga foi lele o le tau faaitiitia aemaise a latou ia aafia. Ona o galuega ae o le isi tulaga i le mea tau faafesili atu ai tai pei la o le tulaga lea sa iai le faamai, le koviti 19 ou te iloa o le ACC it's more le compensation lea. Soo se mea tau accident ma mea tau emergency pe olea le tulaga ou te leo matauina i totonu o le tulafono, e pei e iai se tulaga foi lele o se entitlements ma se allocations pea faapea tai pei o le koviti-19 a ua fai loa le order lea o le SOE le state of emergency pe o iai se fuafuaaga foi lele ua tataua ona o la iai se allocation i tulaga o mea faapea foi lele i tapenaga o fuafuaaga o le Malo, aemaise foi o nisi o tulaga e pei o le Soifua Maloloina ma tulaga ua faapena foi lele o le faaleleiga o auaunaga ma compensate ai ia tagata aua e tasi ia o emergency. E le o se mea foi lele pei se faalavelave tai pei ia o lea la e leo pei o si mea la e faafesili atu ai pe aafia i totonu le vaega lea i le tulafono ma matafaioi a le tatou Faalapotopotoga o le isi vaega lea.

Lau Afioga e tau avatu ai se manatu o le tulaga lea e pei ona saunoa ai foi nisi o sui o tulaga foi lele e manaia a ae toe lauliliu le tulaga lea, aua o lea faaauau le litaea loa le tagata lea e maua ua le entitle le mea foi lele pea faapea ua maliu ile 4 afe lea ua taua ae pei e manaia le siisii i luga o le 4 afe lona tai pei foi o le mea lea ua iai le NPF a o le tulaga foi lele o le tele o tausaga o galue ma faaputu ia le tulaga lea ae oo atu ua maliu ua leo toe galue. Pei e iai ni nai vaega ia e toe talatala pea iai lo tatou tulafono ma tulaga ua faapea ina ia compensate foi ia nai tagata, e le gata i le tulaga lea i se entitlements ina ua litaea pei ona aumai i le fautuaga muamua ae o le tulaga foi lea pe a maliu, poo le a le tulaga aua lea litaea loa. O lona uiga pe iai se isi vaega e tau teuteu ai ina ia more compensate foi le tele o tausaga o galue ma lafo pea le tulaga lea i totonu o tatou ACC, ia pei o nai vaega ia e avatu ai le lagolago a lenei Itumalo i le Komiti , Taitaifono ma lo latou Komiti mamalu tusa ai foi ma Lipoti ma fautaga ua tuuina mai ae manuia tele le tulaga o le faamoemoe aemaise o le usugafono a le tatou maota fono i lenei foi aso, manuia foi lau Afioga i le Fofoga Fetalai, faafetai .

**FOFOGA FETALAI:** Malo faafetai, malo saunoa faafetai saunoaga mo le aemaise o tuualalo aua foi le agai i luma o le tatou Faalapotopotoga. Ia sei tulai mai lau Afioga i le sui mamalu mai Anoamaa Nu 1.

**Afioga ALAIASA MOEFFAAUOUO MALAGAITUTOGIAI SEPULONA MOANANU (Anoamaa 1.):** Faafetai mo le avanoa i lau afioga i le Fofoga Fetalai. Ua alaseu foi i lenei taeao matagofie i le alofa o le Atua lau afioga ma le tatou Palemene. Ia malo le fai o le faiva. Faafetai foi le faatoatoa i fatia foi ua tea aua lenei faamoemoe. Ia e pei ona maua foi i nisi o saunoaga aemaise foi le saunoaga a le afioga i le Tamaitai Palemia, o se faiga lelei tele lenei faiga ua filitofa i ai lau afioga aua le talanoaina o tatou Lipoti Faaletausaga a Matagluega. Ia ma ua taoso ai foi sui usufono i tulaga o faaiuga o galuega a lea Matagaluega ma lea Matagaluega.

O le mea lea e faafetai atu i le tofa na ae i lau afioga. Ia e faatalofa foi ma faatulou i le paia o le Maota i Tiafau o le Maota o le atunuu o le faautugatagi a Samoa e saili i ai le tofa ma le faautaga. Ia e fusi ai le fauomalo aua Samoa mo a taeao. Ia ua tatou i ai foi i le faatautoina o le Afioga ia Lautimuia, ia o le ua tulai foi e fai ma sui usufono o le paia o le itumalo o Vaimauga Nu.3. Ia ua ou matamata lava i le taupati mai o le afioga o Leusoalii ma Sa Ataga ma Fuata i le aso na faatauto ai ia le afioga i le sui usufono. Faamalo faafetai i le Atua ua tofi mai ia lau afioga, ia e tauave ia le itumalo. Ua leva foi ona tautua lau afioga i le Malo. Ia o aso foi ia sa tatou faifai aulakapi lava ma si a matou au o le Lupe o le Soaga, ia ma le le iloa e oo mai i tofiga ua valaau i ai le Atua. E sao ai lava le Upu foi lea o le Tusi Paia na fai i le Perofeta, 'Ia na ou tofia oe a o e i le manava o lou tina.' Ia ae faapena le valaau a le Atua, o le mea lea ia faafulu mai i le lagi le tofa a lau afioga i le sui usufono. O lea foi ua e tulai mai, ia manuia ou faiva. A le faamanuia Lufilufi i ou faiva, ia e tataua lava ona manuia ma tulai toa mai aua le itumalo.

Ia ae fia fai lava sina vaai foi a lenei itumalo i lenei foi Faalapotopotoga. O le faatofalaiga na tofa i ai tuua ua mavae aua le faatuina o lenei Faalapotopotoga, e ese ma le manaia aua e momoe ma manu e le fati, ae sau mala e atiae lenei olaga e tatou te i ai. E tatou te le o foi e sue ni faalavelave. E leai se isi e soifua ma ola e alu e sue se faalavelave e lavea ai. Ae o le laufa le aina ma le moemoenoa o le afuaga lea o nei mea.

Ia lea la ua faatulai mai le Faalapotopotoga, ua faatupulaia i tausaga ua mavae, ma ua tulai mai o se tasi o Faalapotopotoga sili ona tele i totonu o le atunuu. E le gata o le tamaoaiga, o aseta, o tupe teu i le Faletupe, ia o mea ia e maua. E le faagaetia foi la lau vaai i le \$17 miliona le polofiti, e leai o le mea lava e tataua ona polofiti aua e na o le koleti lava ma teu ma faafaigaluega ia aua ne i mitamita ai se tagata faapea o ia na ia faia. E leai, o le mea na fai e le Tulafono e ao atu iai tupe a tagata, e teu e le Faalapotopotoga ma e ua tulai mai i Pulega.

Ia ae e pau lava le mea ou te fiafia ai o le Lipoti ua lipotia ai ua pau i lalo ia faalavelave. Ia ae lea e pei ona taua foi e se isi sui usufono, o le mea lava lea o le ona se i tulou, tago i le taavale, ia fealuai ai.

Faafetai lava ua tuu nei mea o olioli ea pe o a igoa o fagu ia na maua i le isi vaitaimi, fagu malosi. Se mai lava i le matou nuu i tua, e momoli le matou faafetai ua le toe i ai nei mea. Ua oo nei lava foi i le taimi o le kerisimasi ma le tausaga fou i aso fiafia, ua saogalemu. Aisea? Ua taofia ia mea. O le mea foi lea e tataua lava ona tatou vaavaai, matua faamalosia le Tulafono e taofi ai ia mea. E fetagofi ai nai o tatou tagata i tua ma maua ai i le tulaga lea ua le mafai ona toe maua le toafilemu foi lea sa masani ai ona ua faalualuagia i le suaava. Toaga e inu le ava Samoa e lelei e fiafia lava ma talie ma taape fiafia. A o le mea lea.

O le isi tulaga ua maua ai faalavelave, o le fealuai e leai se laisene, aua e pei lava o taavale lava nei e tutupu ai faalavelave nei. Na alu si o matou aiga i le afiafi e faatau ae soa ai e le isi tamaitiiti. Ae ou fesili atu, 'e fia ou tausaga alii? Fai mai, 'e 20.' A o lea lava e fealuai e leai se laisene. Ia, ua laki la faafetai i le Atua na o meatotino o le taavale ua faaleagaina ae le i aafia si loomatua i lana taavale. A o lea la ua ou fesili atu i le laitiiti lea, ua e vaai alii o lena faatoa 20 ou tausaga e tele au teine i le lumanai, a o au a na oti nei le fafine e le toe maua sou toalua e oo mai lava le... A o le mea lea e fautua foi i le tatou atunuu, e ala ona tupu faalavelave o le fai o le mea e le faatagaina i tatou Tulafono.

Ia, e momoli le faamalo i le mea lea o le CT Scan lea na faatau. Ua le iloa pe ou te alu foi i se taimi e fai ai si au... a o lea ua toe mafai ona faaauau le auaunaga. Aisea? Ua iloilo atu e le Komiti o lo o lava le faasoa. Aua ana le lava le faasoa, e le mafai ona faatino. Pau le mea ia toe iloilo ia lua ni faata. E pei ua queue tagata i le faata la e i ai na o le tasi. Ae vaai se isi mea e toe faaleleia ai aua le auaunaga lea i o tatou tagata. Ou te manatu i le mea lea ua fautua ai le Komiti e maua faamanuiaga pe a litaea, e faaleauai lou manatu i le mea lea, leaga o le Tulafono na faataatia e vaai i... Aua e pei la o se faataitaiga i se faalavelave e tupu mai, a goto nei le vaa lea e alu i Savaii ae 300 ma ona tupu tagata la e o ai, e le umi lava ae uma le tatou reserve lea. Ae faafetai i le Atua o lea e le i tupu nei mea, pei ona ou fai atu tatou te le o e sue ni... ae o mea e i ai faalavelave ogaoga e le i tupu ae ono tutupu e ono faaoga uma ai le tatou seleni lea. Afai lava ua uma lou taimi, lou aoga ua ou litaea, e le iloa pe aoga i lou atalii la e o le a alu ifo e faigaluega le mea lea, ae tatou malilie e ositaulaga lou soifua, e aoga mo isi tagata, e aoga mo isi tagata i lou lea talitonuga, a o lea o le a toe sui ai le Tulafono. Ae faafetai i le tali mai o lea o le a toe vaavaai i ai le tatou Komiti. Ae tataua pea ona build pea le tatou reserve lea ma le tatou tupe lea e faaagaaga aua se isi faalavelave ma nisi mea e ono tutupu mai.

Ia, o le matou tala, ia faamanuia i le Pulega. E lagolagoina foi e lenei itumalo leni... aua o le 2020 lea e gata ai le mea lea, toetiiti sau le 2021

ma le 2022, ia ona toe faaauau atu foi lea o nisi manatu o le itumalo. A o le taimi nei, ia faaauau pea le auunaga lelei ma faamanuia i le Komiti Faafae, aemaise foi le tulai mai o le Afioga i le Minisita i le tauavega o lenei Matagaluega taua a le tatou atunuu. Ia soifua ma ia manuia lau Afioga.

**FOFOGA FETALAI:** Malo faafetai, malo foi mo le sao o lau Afioga i le sui usufono mamalu, aemaise foi o le faalototele mai i le faatinoina o le tatou galuega pei ona i ai tatou Lipoti ma... Malo lava faafetai, o lea foi ua faafogafoga le Taitaifono ma le tatou Matagaluega o Tau mo Faalavelave Faafuasei mo le fautuaga ma le tuualalo.

Ia toe 15 a tatou Lipoti mo le silafia e le tatou Maota. Ia, o lea ua maitau atu o lea ua... Ia se i tulai maia lau Afioga i le Taitaifono o lea ua... Oi, malie lava se i tulai maia le sui usufono mo Sagaga 2. Lau Afioga i le sui usufono mamalu.

**Susuga MAULOLO TAVITA AMOSA (Sagaga 2):** Faafetai mo le avanoa. E faatalofa atu i le paia o le tatou Maota nei i Tiafau i lau Afioga i le Fofoga Fetalai aemaise foi le Afioga i le Sui Palemia ma le Kapeneta ma lena Itu o le Malu. E faapea foi le Susuga i le Taitai ma lenei Itu o le Maota Fono, aemaise foi sui o Matagaluega ua tatou faatasi i lenei aso.

E muamua lava e fia faamauina foi se agaga faafetai o lenei itumalo o Sagaga 2 i le Lipoti lea ua taulimaina. E ui lava o le 2019/2020, ae o lona taua o lo o mafai ona tatou mauaina ai taualumaga o le agai i luma o galuega faatino pe a faatusatusa i isi tausaga ua tuanai atu o lo o aumai i le latou Lipoti. O le mea muamua lava, o lo o faamauina i i e 83% le pau o faalavelave o e maliliu mai le tausaga 2019 agai i le 2020. Ou te manatu lava i lou vaivaiga, e taua le silasila totoa po o le a tonu lava le mafuaaga, na pau lava le mea lea e sau i i faapea o le va fealoai tau galuega i le va o le Faalapotopotoga ma i latou e ona galuega, lea e mafua ai le pau lea. Ou te le o malamalama i le faaupuga lea, ae taua lea tulaga ina ia tuliaupu pea ina ia tulai mai pea se tulaga o le faaitiitia o faalavelave faafuasei ma isi tausaga o lumanai.

O le tulaga o i ai le teuteuga o Tulafono ia, o lea sa gata i le 2009, atonu ua talafeagai foi se isi teuteuga i se taimi lata mai pe a talafeagai ai, aemaise la i le vaavaai atu i la outou vaaiga taulai po o la outou vision o lo o faapea mai, ia mautu faiga faavae tau tau. Ou te lagolagoina le tele o finagalo ua faaalua matafogie pe ua le tataua ona tau talatala teisi i tua le upega o faamanuiaga e maua nai lo na o latou e aafia i faalavelave tau taavale. E le gata i lea, e silasila ane foi le Afioga i le Komiti Faatonu i la outou manulauti i le tulaga o i ai pe faamata o tali la outou aumaiga o le \$20,000 lea pe a faapea e le faigaluega le tina a o le tama la e faigaluega. Ae a faigaluega le tama ma le tina, na o le \$16,000. E ono faapea foi se manatu o le tina, e le fetai lea mea, o la e tipi le ACC a lou toalua toe tipi ma lau ACC ae sau e

pau le mea lea ou te maua? E pei o lagona faapena e fetuunai ai po o talafeagai, po o talafeagai ma la outou vision ma la outou manulauti lea e aumai. Po o talafeagai le tupe e tau ai, aemaise o lea ua matauina le tele o le tupe faasili lea ua maua. E le taumate o le agaga maualuga ia i le tatou Malo foi i lea taimi e oo mai i le aso ua mafua ai ona laei uli i le aso. E mafua i se a? E manatu mamafa i le saogalemua o le itupa o tamaitai, tina ma le fanau. Se i silasila ane lava po o talafeagai le tupe e \$20,000 ma la outou vaaiga taulai ma le manulauti o lo o tuu mai i i. Po o responsive, po o tali atu i manaoga o i latou ua aafia le tupe lea o le \$20,000 aemaise o lea ua tulai mai i se tulaga ua tele lava foi le faasiliga o le polofiti. Ia faamalo lava foi le faasoa limalelei i le Komiti Faatonu ma le Matagaluega.

E pei na o le pau lena o si mea na ou fia tulai atu ai o lea ua maua mai isi vaega, se i toe silasila i ai aemaise lava ina ia tutusa nei mea uma ma la outou vaaiga taulai lena ua tuu mai i ina. Ma le faaaloalo lava. Manuia le Fono.

**FOFOGA FETALAI:** Malo faafetai. Ia, malo foi le fesoasoani mai i le Nofoa, atonu o lena ua maua lava le tele o nisi o mea na saunoa i ai nisi sui usufono. Ia e faapena lava ona tatou felagolagomai ona e fai si tele o le tatou galuega.

Ia lau Afioga i le Taitaifono, ia o le avanoa leni e te talifuaitau ai foi i nisi o mea sa laga e sui usufono mamalu o le Maota.

**Afioga LAUMATIAMANU RINGO M. PURCELL:** Ia, faafetai mo le avanoa ua toe tuuina mai aua le tali atu foi i faafesili, ia a o ni fautuaga foi sa tuuina mai e le mamalu o sui usufono.

Lau Afioga i le Fofoga Fetalai, e pei ona fesiligia foi e le sui usufono o le Taitai foi o le Itu Agai i le tulaga foi o le resitalaina o autaaalo ia faapea foi i latou o lo o avea ma tagata taalo. I le taimi nei o lo o i ai i le final stage le draft ina o le Tulafono, e faapena ona limataitaiina ai le autaaalo ae faapea foi i latou o kalapu ma tulaga faapena ina ia faatulaga lelei tulaga foi pe a toe oo mai le Tulafono lea i totonu o le Palemene i se taimi o i luma.

Ae momoli foi le agaga faafetai i Afioga i Minisita ma le Komiti Faatonu sa i ai le faatofalaiga lea ia aafia autaaalo ma kalapu i le tulaga lea o le resitalaina o i latou i ni tau i taimi o taaloga.

Na fesiligia foi le tatou poloketi i Otahuhu pei ona faaaluina ai le \$4.7 miliona. E pei ona silafia o le poloketi leni sa faatauina i seleni a le ACC, o le Malo o le ACC lava lena. O le taimi nei la o lo o lisiina atu e faaogaina e le STEC, a o le tologiina, e togitogi mai agai le MOF mo le silafia e le tatou Maota.

Ia ou te talitonu e tele lava ni faafesili sa aumai i tina ma tama. O tama faigaluega, o tama faigaluega, ia ma tina le faigaluega, e pei o le tulaga lea o lea e tele ai faafesili. Ia, a o le faamanino o vaega ia, o le tina e le faigaluega ae faigaluega le tama, pei o le tilotilo a le Matagaluega po o le

Faalapotopotoga foi i le faalagolagomaga foi lea atoatoa. A faapea o le tina e le i faigaluega ae faigaluega le tama, o le faalagolagomaga atoa o le tina o le tama, ona o lea sa faigaluega. A o le faamatalaga o lo o avatu i le Lipoti, e mafai ona vice versa. Afai foi e le faigaluega le tama ae faigaluega le tina, o le tupe lava lena e maua, e \$20,000. E le faapea o avatu foi lea faapitotasi ina ia faapea ai e faaituau le faaiuga. E leai, na ona avatu lava i le Lipoti, ae a tutupu faalavelave, e vice versa, e mafai ona maua foi e le tama le \$20,000, e mafai foi ona maua e le tina le \$20,000.

Ia, e pei o tulaga na e faamanino ai ia vaega. O agavaa o tamaiti, o lo o tuu lava i le faitalia o matua le resitalaina e tai pei lava foi o le NPF, a e manao e te togi lafoga i le NPF, ia e voluntary le tulaga lena. A faapea e te manao e fai se ACC a lau fanau mai lava i le laititi, e tuu atu lava le avanoa i matua e faisao faga ai i le tulaga lava foi o le ACC, aua a i ai ni faalavelave tutupu mai a o pepe po o... ia e maua uma foi faamanuiaga e pei ona faataatia atu ai le auivi i le Lipoti a le Komiti.

E pei ona fesiligia foi e le Afioga ia Aliimalemanu le tulaga foi o le auga o le... ma le aim o le vaega lea a le ACC. O le faavaa ma le tilotilo mamao foi lea i le igoa o le Faalapotopotoga, is Accident Compensation. O Tulafono 1989 a le Faalapotopotoga i lona Vaega 56 o lo o mafai ona i ai le faatagaga faaletulafono e faataga ai le Faalapotopotoga e fai a latou teugatupe, term deposit. Ia e faapena foi le faatauina o ni fanua ma aseta. E mafai foi ona fesoasoani i le Malo, aua o le ACC lava o le Malo i tulaga pei ona i ai le Tala o le Tupe lena tou te silasila i ai, ia o lea sa ave le \$1 miliona e fesoasoani i le vaega foi lea a le Samoa Airways. Sa ave foi le \$1 miliona i le vaitaimi o le Koviti-19. Ou te iloa e tali ai faafesili foi a nisi o sui usufono sa fesili mai i tulaga ia. A o le Vaega 56 o le Tulafono 1989 o Tau i o Faalavelave Faafuasei, o lo o i ai le vaega lena e mafai ai ona invest le tulaga foi o tupe ina ia faatupu seleni aua ni faalavelave e ono tutupu mai. E pei lava foi sa laga e nisi o sui usufono sa lagalaga, a faapea e goto le vaa feoti pe maliliu le 300 o le pasese, ia o le ala lea e ala ai ona faaputu faaputugatupe ia e tali atu ai i ni manaoga tatou te le iloa. Aua o nei lava fuafuaga, sa faatino e o tatou matua ma tuua ua mavae ina ia mafai ai ona tali atu i manaoga.

E pei lava foi ona outou silafia, afai o le 1970 faasolo mai i luma nafuafua ai lenei Faalapotopotoga, ia o lena vaitau e le i atoa se 100,000 o si o tatou atunuu. O letaimi lenei, ua silia ua toetiiti o oi le kuata miliona le tatou faitauaofai. Ia o le vaai foi i lena vaitau a i latou sa amatalia le Tulafono ma faatu lenei... e pei e gata foi lea le vaai, o le taimi lenei ua tupu tagata, ua tupu taavale, ua tupu le tele o mea uma i le tatou atunuu. O le ala foi lea ou te talitonu o lea ua tele ai nisi o fautuaga e aumai, ae faafetai o lea e faafogafoga atu le Tamaitai Pule ma le Komiti Faatonu, ia ma tatou o lo o faia Tulafono tatou te silasila i le lumanai i le faufauina o nisi Tulafono e tatau i ai le mafaufau foi ma le faataga ina ia taatia i se tulaga lelei aua tatou tupulaga ma fanau o le lumanai.

O le mataupu ua mafai foi ona saunoa i ai le sui usufono mo Anoamaa, o le tatou ositaulaga. Faafetai o lea e maua lava le agaga. Se o le mea lea e lelei ai le Aposetolo o lo o talai, ia e faapena ona ositaulaga aua si o tatou atunuu. Ia a o lea lava na toe ioe mulimuli e...

**Afioga Alaiasa Moefaauouo Malagaitutogiai Sepulona Moananu:** Lau Afioga i le Fofoga Fetalai...

**FOFOGA FETALAI:** Ia malie lau Afioga i le Taitaifono leaga o lea ua e taua le Aposetolo, le Afioga i le sui usufono mamalu mai Anoamaa 1.

**Afioga Alaiasa Moefaauouo Malagaitutogiai Sepulona Moananu:** Ia, ou te faafetai lava i le Taitaifono. Faafetai i le Taitaifono ua na fausia se fautuaga faa-Aposetolo. Aua o ia e ana le fautuaga lea e fai mai, e fai le litaea a le tagata pe a oo i le tulaga foi lea ua... Ia e pei o le matou tuualalo lea ua toe sui ai lona finagalo, o le a leai se mea e faia. Ae faafetai i lau Afioga i le Taitaifono.

**FOFOGA FETALAI:** Se i tulai mai lau Afioga i le Taitaifono e faaauau le saunoaga.

**Afioga LAUMATIAMANU RINGO M. PURCELL:** Malo faafetai. Leai o le tulaga lava ia o le Komiti ma i matou o lo o i ai foi i le Komiti o le Va Fealoai, o le matou lava tofi o le faamataosi i tulaga faapea e aumai foi ni manatu e avatu i le tatou Fonotaga e aumai ai ni o outou finagalo aua foi le faufauina o si o tatou Malo. Ae i ai le talitonuga o Lipoti nei o Lipoti o le 2019/2020, ae faafetai o lea ua tatou talanoa i le tausaga lenei 2023, ua aumai ai nisi manatu fou e faufau ai le tatou agai atu i luma. Aua o le mea moni, e le i aumaia le Lipoti o le 2021/2022. Ia o lona uiga o le isi foi taimi lena ua tataua la ona i ai nisi o tatou manatu fou e faufau ai le tatou Faalapotopotoga.

A o se avanoa foi e momoli ai le agaga faafetai i le Afioga i le Tamaitai Pule ma le afaigaluega aemaise foi le Komiti Faafae a le ACC mo le faatinoina o galuega i lea foi tausaga. E talitonu foi o ni fautuaga ua tuuina mai ua faamauina aua nisi o tatou Lipoti i le lumanai. Ma le faaloalo lava faafetai.

**FOFOGA FETALAI:** Malo saunoa i lau Afioga i le Taitaifono. Ia, atonu o lea foi sa faafofoga foi a outou Afioga i le Taitaifono i le saunoaga a le Palemia, ina ia taumafai e tuufaatasi le tatou Lipoti ina ia faapena ona manino atoatoa ai lea tausaga ma lea tausaga, ma lea tausaga, ina ia vave ona oo mai le tatou Lipoti. Ae malo faafetai mo le galuega.

Se i tulai mai lau Afioga i le Minisita mo Galuega Tetele.

**Tofa Hon Olo Fiti Afoa Vaai:** Faafetai tele i lau Afioga i le Fofoga Fetalai ona e i ai nai vaega o le Lipoti lea o lo o fia avatu ai foi se fesoasoani a lenei itu, e ui lava o le Lipoti o le 3 tausaga talu ai ae aumai fautuaga o fautuaga o lenei tausaga. Ae o le a le afaina lea.

A o le mea ua ou tulai atu ai lau Afioga i le Fofoga Fetalai ona o se pasene o le levy lea, lea ua i ai Afioga foi i sui usufono ua fesiligia ai le tulaga lea i le tele o se tupe i le LTA, ae ua tataua ona lava le faasoa i le faiga o auala ma tulaga faapena.

Lau Afioga i le Fofoga Fetalai, e moni lava e tele le pasene o le levy, ae le o se tupe foi lea mo le fausiaina o auala ma nisi o vaega. O le tupe lea sa faaagaaga lava mo le tatou metotia foi ia ma taiala o le faalauiloa i le saogalemu o femalagaaiga i luga o le auala ma nisi o vaega, e tai pei o le road safety awareness foi lea tout e silasila i ai i luga o TV, o Facebook ma tulaga faapena. Atonu o le tulaga foi lena o lea foi ua saunoa manino le Afioga i le sui usufono mo Satupaitea ua tuutiitia ai le tulaga o faalavelave faafuasei i luga o auala ma tulaga faapena, ona o lea e faaogataua sina vaega o le levy lea e fai ai faalauiloa.

O le isi itu lea sa taua i le tulaga o ni tau mo si au fanau lea, vaeatu ia... lea e o e faitau mita foi ia o vai. E pei lava ona ou fai atu o le taimi lena ua 3 i le 4 tausaga talu ai le vaega lena, a o i ai mita i totonu o fanua o aiga. Ia lena la sa ai e taifau vaeatu le... a o le taimi lenei, o lea ua tele ina i tua mita ina ia faafaigofie foi le latou galuega, a o la e foi na ai e maile vaeatu le faafogafoga, o le o fua latalata i fale o aiga, a o mita e i luma o auala.

Ia pei o lou tulai atu lea ma le faaaloalo lau Afioga. Faafetai.

**FOFOGA FETALAI:** Ia malo faafetai, malo foi saunoa ma fesoasoani mai i le pitolaau foi a le Komiti aemaise foi o le tatou Kapeneta.

Lau Afioga i le Sui Palemia, ia pe i ai sau saunoaga e faaopoopo ma faamaea ai le Lipoti. Ma le faaaloalo.

**Afioga Hon TUALA TEVAGA IOSEFO PONIFASIO:** Ia faafetai mo le avanoa lau Afioga i le Fofoga Fetalai.

Ou te faatulou i le Maota i Tiafau nei i ona tulaga faalupe aemaise o le pau o le malae. Ua maitau atu ua tele saunoaga ua maea foi ona aoaomanogi le Taitaifono ma le Komiti i fautuaga uma, aemaise saunoaga matagofie ua tuuina mai faatamalii i se tulaga matagofie e fai lea ma fautuaga aua le galuega fai a le Komiti Faatonu aemaise foi le Taitaifono ma lana Komiti.

Ua ou tulai atu na o nai mea lava oute fia pa ii ai i lenei taeao, ou te iloa lava o lea ua faamaumau uma lava saunoaga a le Maota nei e tusa ai foi ma le tuualalo ua tuuina mai. A o se aotelega o sau faamatalaga ona e pei foi ona saunoa e i ai nisi o sui usufono i le taua ma le aoga o leei Faalapotopotoga i le mafuaaga ma lona aoga ua ala ai ona faatu ina ia maua ni tau mo tagata o le tatou atunuu pe a tulai mai ni faalavelave faafuasei. O

le matafai oi foi lea a lenei faalapotopotoga ina ia uunaia pea le saogalemu aemaise o le puipuiga o tatou tagata mai faalavelave faafuasei po o faalavelave e le i mafauina ae ua tulai mai. Ua uma foi ona aumai le faamalo ma le faafetai i nisi foi o sui usufono i le tatou Faalapotopotoga, ma ou te piiama foi i ai ma avatu sau faafetai e tusa ai foi ma le faatautaia e le afioga i le Ofisa Sili o Pulega aemaise foi o le Faalapotopotoga o tulaga uma lava o lo o uunaia ai le saogalemu o le atunuu e ala mai lea i le faalauiloa ma le tauiologolo pea ina ia aua ne i tulai mai le tulaga o le faatamala, a ia mataala pea lo tatou atunuu, ma aloaloes mai vaega e ono lepetia ai le saogalemu.

O le matau a lou sui usufono i le tele o saunoaga, e agai lava i le tulaga o le faatinoga o le galuega fai a lenei Faalapotopotoga. O si ou taofi vaivai, o lenei Faalapotopotoga o lo o avea le Tulafono ma taiala, le Tulafono lea o Taui o Faalavelave Faafuasei, lea na gata lona iloilogia i le 2009. O lau la matau, o so o se Faalapotopotoga e uia auala o le tulafono, ou te iloa o se faalapotopotoga foi lea e manuia. O se Faalapotopotoga foi lea e faafaigofie ona taiala ona o lo o taiala Tulafono. O lea o lo o fua mai ai faamanuiaga e pei ona outou silafia, o lo o faatupulaia pea le tulaga i le seleni o lo o faapena ona maua. O lea foi ua agai le Faalapotopotoga i le faagalueaina o nisi o latou tupe, ina ia toe fua mai ma tele mai, ia faaputupu pea aua le manuia o Samoa ma ona tagata.

O le tele lava o fesili ua tuuina mai, ou te iloa o lea ua faamauina. Ae tau lava ina ou pai atu i se vaega, ona ou te iloa o le tele lava o fesili, o lo o agai saunoaga i le tulaga i tagata e ono penefiti mai i faamanuiaga a lenei Faalapotopotoga. O le a leai sau tala tele e fai i lea tulaga, ae ou te iloa o le auga, o fautuaga uma ua tuuina mai, ina ia i ai se suiga o le Tulafono. O le Tulafono lea o lo o mulimulitaia e le Ofisa Sili o Pulega faapea foi le Faalapotopotoga, ma o le tele lava o fautuaga, e le mafai ona latou faatino seiloga lava ua toe Iloilo le tulaga o le faiga faavae, ona toe sui ai lea, pe toe fai ai lea o nisi teuteuga o le Tulafono.

Ma e matau ua fai foi sina leva, ua ova nei ma le sefulu tausaga e le i toe iloilo lava lenei Tulafono. Ae o lea ua uma ona aumai le fautuaga i nisi foi o sui usufono, ina ia toe tagai i le tulaga o le Tulafono. Ma e i ai foi le manatu, e le aoga ona tatou Iloilo i na o ni vaega o le Tulafono e pei ona saunoa i ai le Taitaifono, i le tulaga lea i na o sina vaega, aua le faamanuiaga i le autaaalo. E i ai lava le lagona, o mea faapenei, e le aoga ona togi na o sina vaega, ae ao ona tatou tilotilo i le aotelega e maua ai le ata atoa. Ma o lau faalogologo foi ma le totota i le tele o saunoaga ma fautuaga, o lea ua tele lava ia manatu faaalua, ina ia tapena ai foi le Komiti Faatonu aua le toe iloilo lava o lenei Tulafono....

**FOFOGA FETALAI:** Ua ou vaelupeina le saunoaga a lau afioga i le Sui Palemia, e talu ai o lea ua logo mai le Nofoa, e le o ola le tatou leitio, le 2AP, o le Ofisa faasalalau lea o lo o molimauina ai e le toatele o le atunuu le fonu.

Ua i ai le manatu o le a faataatiaese tatou Galuega i le taimi lenei mo le malologa o le vai-aiga o le sefululua, ae se i faatali ma siaki le 2AP, o lea e faalogologo mai, po o faapefea mai le fesootaiga ona toe faaauau ai lea o le tatou Fonotaga.

O le a faataatiaese a tatou Galuega se i aulia le itula e 2:00 e talafeagai lelei ma tapenaga, ma ia oo atu i ai, ua toe ola mai faasalalau a le 2AP mo tatou Fonotaga.

O le talosaga lea ma le faaaloalo i le mamalu o le tatou Maota, aemaise foi o le faafogafoga mai a le atunuu.

*Na faataatiaese Taulumaga a le Fono Aoa Faitulafono i le itula 12.39 i le aoauli ma toe faaauau i le itula e 2:00 i le afiafi.*